

欽定魏書

卷一百一十二
四百一十一
十之十

魏書卷一百一十二上

齊

魏

收

撰

志第十七

靈徵八上

帝王者配德天地協契陰陽發號施令動關幽顯是以
克躬脩政畏天敬神雖休勿休而不敢怠也化之所感
其徵必至善惡之來報應如響斯蓋神祇眷顧示禍
福人主所以仰瞻俯察戒德慎行弭謹咎致休禎圓首
之類咸納於仁壽然則治世之符亂邦之孽隨方而作
厥迹不同眇自百王不可得而勝數矣今錄皇始之後

卷一百一十一

災祥小大總爲靈徵志

地震

洪範論曰地陰類大臣之象陰靜而不當動動者臣下彊盛將動而爲害之應也

太宗泰常四年二月甲子司州地震屋室盡搖動

世祖太延二年十一月丁卯并州地震

四年三月乙未京師地震

十一月丁亥幽兗二州地震

真君元年五月丙午河東地震

高祖延興四年五月鴈門崎城有聲如雷自上西引十

餘聲聲止地震

十月己亥京師地震

太和元年四月辛酉京師地震

五月統萬鎮地震有聲如雷

閏月秦州地震殷殷有聲四年正月雍州氐民齊男王
反

二年二月丙子兗州地震四年十月蘭陵民桓富反殺
其縣令

七月丁卯并州地震有聲

三年三月戊辰平州地震有聲如雷野雉皆雊

十月丁卯京師地震五年二月沙門法秀謀反

四年五月己酉并州地震

五年二月戊戌秦州地震

六年五月癸未秦州地震有聲

八月甲午秦州地震有聲如雷乙未又震

七年三月甲子秦州地震有聲

四月丁卯肆州地震有聲

六月甲子東雍州地震有聲

八年十一月丙申并州地震

十年正月辛未并州地震殷殷有聲

閏月丙午秦州地震

二月甲子京師地震丙寅又震

丙午秦州地震有聲

三月壬子京師及營州地震十二年三月中散梁衆保謀反

十九年二月己未光州地震東萊之牟平虞丘山陷五所一處有水

二十年正月辛未并州地震

四月乙未營州地震十二月桓州刺史穆泰等在州謀反誅

二十二年三月癸未營州地震

八月戊子兗州地震

九月辛卯并州地震

二十三年六月乙未京師地震

世宗景明元年六月庚午秦州地震

四年正月辛酉涼州地震

壬申并州地震

六月丁亥秦州地震

十二月辛巳秦州地震正始三年正月秦州民王智等聚衆二千自號王公尋推秦州主簿呂苟兒爲主

正始元年四月庚辰京師地震

六月乙巳京師地震

二年九月己丑恒州地震

三年七月己丑涼州地震殷殷有聲城門崩

八月庚申秦州地震九月夏州長史曹明謀反

永平元年春正月庚寅秦州地震三年二月泰州沙門

劉光秀謀反

九月壬辰青州地震殷殷有聲

二年正月壬寅青州地震

四年五月庚戌恒定二州地震殷殷有聲

十月己巳恒州地震有聲如雷

延昌元年四月庚辰京師及并朔相冀定瀛六州地震
恒州之繁峙桑乾靈丘肆州之秀容鴈門地震陷裂山
崩泉湧殺五千三百一十人傷者二千七百二十二人
牛馬雜畜死傷者三千餘後爾朱榮彊擅之徵也

十月壬申秦州地震有聲

十一月己酉定肆二州地震

十二月辛未京師地震東北有聲

二年三月己未濟州地震有聲

閏月丙戌京師地震

三年正月辛亥有司奏肆州上言秀容郡敷城縣自延
昌二年四月地震於今不止爾朱榮徵也

四年正月癸丑華州地震

十一月甲午地震從西北來殷殷有聲丁酉又地震從
東北來

肅宗熙平二年十二月乙巳秦州地震有聲

正光二年六月秦州地震有聲東北引五年莫折念生
反

三年六月庚辰徐州地震孝昌元年元法僧反
孝靜武定三年冬并州地震

七年夏并州鄉郡地震

山崩

鴻範論曰山陽君也水陰民也天戒若曰君道崩壞百姓將失其所也

太祖天賜六年春三月恒山崩

世祖太延四年四月己酉華山崩其占曰山嶽配天猶諸侯之係天子山嶽崩諸侯有亡者沮渠牧犍將滅之應

世宗景明元年五月乙丑齊州山茌縣太陰山崩飛泉湧出殺一百五十九人

四年十一月丁巳恒山崩

正始元年十一月癸亥恒山崩

延昌三年八月辛巳兗州上言泰山崩頽石湧泉十七處泰山帝王告成封禪之所也而山崩泉湧陽黜而陰盛岱又齊地也天意若曰當有繼齊而興受禪讓者齊代魏之徵也

大風

京房易傳曰衆逆同志至德乃潛厥異風

太宗永興三年二月甲午京師大風五月己巳昌黎王

慕容伯兒謀反伏誅

十一月丙午又大風五年河西叛胡曹龍張大頭等各領部衆二萬入蒲子

四年正月癸卯元會而大風晦冥乃罷

五年十一月庚寅京師大風起自西方

神瑞元年四月京師大風

二年正月京師大風三月河西飢胡反屯聚上黨推白亞栗斯爲盟主

世祖太延二年四月甲申京師暴風宮牆倒殺數十人
三年十二月京師大風揚沙折樹

真君元年二月京師有黑風竟天廣五丈餘四月庚辰

沮渠無諱寇張掖禿髮保周屯于刪丹嶺

高宗和平二年三月壬午京師大風晦暝

高祖延興五年五月京師赤風

太和二年七月庚申武川鎮大風吹失六家羊角而上
不知所在

壬戌雍州赤風

三年六月壬辰相州大風從西上來發屋折樹

七年四月相豫二州大風

八年三月冀定相三州暴風

四月濟光幽肆雍齊六州暴風

九年六月庚戌濟洛肆相四州及靈丘廣昌鎮暴風折木

十二年五月壬寅京師連日大風甲辰尤甚發屋拔樹六月壬申京師大風

十四年七月丁酉朔京師大風拔樹發屋

二十三年八月徐州自甲寅至己未大風拔樹

閏月庚申河州暴風大雨雹

世宗景明元年二月癸巳幽州暴風殺一百六十人
三年閏月甲午京師大風拔樹發屋吹折閭門關
九月丙辰幽岐梁東秦州暴風昏霧拔樹發屋

四年三月己未司州之河北河東正平平陽大風拔樹
正始元年七月戊辰東秦州暴風拔樹發屋

二年二月癸卯有黑風羊角而上起於柔立鎮蓋地一
頃所過拔樹甲辰至於營州東入於海

四年五月甲子京師大風

永平元年四月壬申京師大風拔樹八月癸亥冀州刺
史京兆王愉據州反

三年五月己亥南秦州廣業仇池郡大風發屋拔樹
延昌四年三月癸亥京師暴風從西北來發屋折樹
肅宗熙平二年九月瀛州暴風大雨自辛酉至於乙丑

正光三年四月癸酉京師暴風大雨發屋拔樹

四年四月辛巳京師大風

孝昌二年五月丙寅京師暴風拔樹發屋吹平昌門扉壞永寧九層澄折於時天下所在兵亂

前廢帝普泰元年夏大風雨吹普光寺門屋於地

孝靜武定七年三月潁川大風

大水

鴻範論曰大水者皆君臣治失而陰氣稽積盛彊生水雨之災也

太祖天賜三年八月霖雨大震山谷水溢

太宗泰常三年八月河內大水

世祖延和元年六月甲戌京師水溢壞民廬舍數百家
真君八年七月平州大水

高祖太和二年夏四月南豫徐兗州大霖雨

六年七月青雍二州大水

八月徐東徐兗濟平豫光七州平原枋頭廣阿臨濟四

鎮大水

九年九月南豫朔二州各大水殺千餘人

二十二年戊午兗豫二州大霖雨

二十三年六月青齊光南青徐豫兗東豫八州大水

世宗景明元年七月青齊南青光徐兗豫東豫司州之
潁川汲郡大水平隰一丈五尺民居全者十四五

正始二年三月青徐州大雨霖海水溢出於青州樂陵
之隰沃縣流漂一百五十二人

永平三年七月州郡二十大水

延昌元年夏京師及四方大水

二年五月壽春大水

肅宗熙平元年六月徐州大水

二年九月冀瀛滄三州大水

正光二年夏定冀瀛相四州大水

孝昌三年秋京師大水

出帝太昌元年六月庚午京師大水穀水汎溢壞三百餘家

孝靜元象元年定冀瀛滄四州大水

興和四年滄州大水

湧泉

太宗泰常五年十二月壬辰湧泉出于平城

高宗和平五年十一月鴈門泉水穿石湧出

前廢帝普泰元年秋司徒府太倉前井並溢占曰民遷流之象永熙一年十月都遷於鄆

孝靜天平四年七月泰州井溢

元象元年二月鄴城西南有枯井溢

雨雹

鴻範論曰陽之專氣爲雹陰之專氣爲霰此言陽專而
陰脅之陰專而陽薄之不能相入則專而爲雹猶臣意
不合於君心也

高祖延興四年四月庚午涇州大雹傷稼

承明元年四月辛酉青齊徐兗大風雹

八月庚申并州鄉郡大雹平地尺草木禾稼皆盡
癸未定州大雹殺人大者方圓二尺

世宗景明元年六月雍青二州大雨雹殺麇鹿

四年五月癸酉汾州大雨雹

六月乙巳汾州大雨雹草木禾稼雉兔皆死

七月甲戌暴風大雨雹起自汾州經并相司兗至徐州而止廣十里所過草木無遺

正始二年三月丁丑齊濟二州大雹雨雪

永平三年五月庚子南秦廣業郡大雨雹殺鳥獸禾稼

雪

鴻範論曰春秋之大雨雪猶庶徵之恒雨也然尤甚焉夫雨陰也雪又陰也大雪者陰之穠積盛甚也一日與

大水同冬故爲雪耳

世祖始光二年十月大雪數尺

眞君八年五月北鎮寒雪人畜凍死是時爲政嚴急
高祖太和四年九月甲子朔京師大風雨雪三尺

世宗正始元年五月壬戌武川鎮大雨雪

四年二月乙卯司相二州暴風大雨雪

九月壬申大雪

肅宗正光二年四月柔玄鎮大雪

霜

京房易傳曰興兵妄誅茲謂亡法厥災霜夏殺五穀冬

殺麥誅不原情茲謂不仁夏先大霜

太祖天賜五年七月冀州賈霜

世祖太延元年七月庚辰大賈霜殺草木

高宗和平六年四月乙丑賈霜

高祖太和三年七月雍朔二州及枹罕吐京薄骨律敦
煌仇池鎮並大霜禾豆盡死

六年四月潁州郡賈霜

七年三月肆州風霜殺菽

九年四月雍青二州賈霜

六月洛肆相三州及司州靈丘廣昌鎮賈霜

十四年八月乙未汾州貢霜

世宗景明元年四月丙子夏州貢霜殺草

六月丁亥建興郡貢霜殺草

八月乙亥雍并朔夏汾五州司州之正平平陽頻暴風

貢霜

二年三月辛亥齊州貢霜殺桑麥

四年三月壬戌雍州貢霜殺桑麥

辛巳青州貢霜殺桑麥

正始元年五月壬戌武川鎮貢霜

六月辛卯懷朔鎮貢霜

七月戊辰東秦州貢霜

八月庚子河州貢霜殺稼

二年四月齊州貢霜

五月壬申恒汾二州貢霜殺稼

七月辛巳幽岐二州貢霜

乙未敦煌貢霜

戊戌恒州貢霜

三年六月丙申安州頻貢霜

四年三月乙丑幽州頻貢霜

四月乙卯敦煌頻貢霜

八月河州震霜

永平元年三月乙酉岐幽二州震霜

己丑并州震霜

四月戊午敦煌震霜

二年四月辛亥武州鎮震霜

延昌四年三月癸亥河南八州震霜

肅宗熙平元年七月河南北十一州霜

無雲而雷

鴻範論曰雷陽也雲陰也有雲然後有雷有臣然後有君也雷託於雲君託於臣陰陽之合也故無雲而雷示

君獨處無臣民也

顯祖皇興元年七月東北無雲而雷

二年七月東北有聲如雷

世宗延昌元年二月己酉有聲起東北南引殷殷如雷
二聲而止

鼓妖

世祖太延四年十月辛酉北有聲如大鼓西北行

雷

鴻範論曰陽用事百八十三日而終陰用事亦百八十三日而終雷出地百八十三日而入地入地百八十三

卷之二十一
日而復出地是其常經也故雷安萬物安雷害萬物害猶國也君安國亦安君害國亦害不當雷而雷皆失節也

世祖神䴥元年十月己酉雨雷電

太延三年十月癸丑雷

四年十一月丁亥雷

高祖太和三年十一月庚戌豫州雷雨

戊申豫州大雷雨平地水三寸

四年十月戊戌雷

七年十一月辛巳幽州雷電城內盡赤

世宗景明二年十一月辛卯涼州雷七發聲

三年十二月己巳夜雷九發聲

正始元年十一月甲寅秦齊荆朔四州雷電

肅宗正光元年正月壬寅雷

震

春秋震夷伯之廟左丘明謂展氏有隱慝焉劉向以爲夷伯世大夫天戒若曰勿使大夫世官將專事也

太祖天賜六年四月震天安殿東序帝惡之令左校以衝車攻殿東西兩序屋毀之帝竟暴崩

顯祖皇興二年十一月夜震電

高祖太和三年五月戊午震東廟東中門屋南鴟尾
霧

班固說上不寬大包容臣下則不能居聖位貌言視聽
以心爲主四者皆失則區晉無識故其咎霧

世祖太延四年正月庚子雨土如霧于洛陽

高祖太和十二年十一月丙戌土霧竟天六日不開到
甲夜仍復濃密勃勃如火烟辛慘人鼻

世宗景明三年二月己丑秦州黃霧雨土覆地

八月己酉濁氣四塞

四年八月辛巳涼州雨土覆地亦如霧

正始二年正月己丑夜陰霧四塞初黑後赤

三年正月辛丑土霧四塞

九月壬申黑霧四塞

延昌元年二月甲戌黃霧蔽塞時高肇以外戚見寵兄弟受封同漢之五侯也

桃李花

庶徵之恒燠劉向班固以冬亡冰及霜不殺草之應京房易傳曰夏暑殺人冬則物華實

世祖真君五年八月華林園諸果盡花

高祖延興五年八月中旬桃李花

藝文志 卷二十一
承明元年九月幽州民齊淵家杜樹結實既成一朝盡落花葉復生七日之中蔚如春狀

世宗景明四年十一月齊州東清河郡桃李花

延昌四年閏十月辛亥京師柰樹花

火不炎上

鴻範傳曰棄法律逐功臣殺太子以妾爲妻則火不炎上謂火失其性而爲災

高宗太安五年春三月肥如城內大火官私廬舍焚燒畧盡唯有東西二寺佛圖像舍火獨不及

高祖太和八年五月戊寅河內沁縣澤自然稍增至百

餘步五日乃滅

世宗景明元年三月乙巳恒岳祠災

肅宗正光元年五月鈞盾禁災

孝昌二年夏幽州道縣地然

三年春瀛州城內大火燒三千餘家

出帝永熙三年二月永寧寺九層佛圖災旣而時人咸言有人見佛圖飛入東海中永寧佛圖靈像所在天意若曰永寧見災魏不寧矣渤海齊獻武王之本封也神靈歸海則齊室將興之驗也

三月并州三級寺南門災

孝靜天平四年秋鄴閭闔門東闢火

武定三年冬汾州西河北山有火潛行地下熱氣上出
黑眚黑祥

世祖始光二年正月甲寅夜天東南有黑氣廣一丈長
十丈占有兵二月慕容渴悉隣反於北平

顯祖皇興三年正月河濟起黑雲廣數里掩東陽城上
昏暗如夜旣而東陽城潰

世宗景明三年九月己卯黑氣四塞甲辰揚州破蕭衍
將張囂之斬級二千

赤眚

高祖太和二年十一月丁未夜有三白氣從地出須臾
變爲黃赤光明照地

十六年九月丁巳昏時赤氣見於西北長二十丈廣八
九尺食頃乃滅

世宗延昌元年三月丙申有赤氣見於天自卯至戌

肅宗正光元年十一月辛未西北赤氣竟天畔似火氣
京師不見涼州以聞

三年九月甲辰夜西北有赤氣似火燭東西一匹餘北
鎮反亂之徵

五年五月癸酉申時北有赤氣東西竟天如火燭

莊帝永安三年十一月己丑有赤氣如霧從顯陽殿階西南角斜屬步廊高一丈許連地如絳紗幔自未至戌不滅帝見而惡之終有幽崩之禍

孝靜天平三年正月己亥戌時東方有赤氣可三丈餘三食頃而滅

青眚

莊帝永安三年六月甲子申時辰地有青氣廣四尺東頭緣山西北引至天半止西北戌地有黑赤黃雲如山峯頭有青氣廣四尺許東南引至天半二氣相接東南氣前散西北氣後滅亦帝執崩之徵也

夜妖

班固說夜妖者雲風並起而杳冥故與常風同象也溫而風則生魑膳之孽

世宗正始元年六月乙巳晦

八月甲辰晝晦

人痾

劉歆說貌之不恭是謂不肅上嫚下暴則陰氣勝水傷百穀衣食不足姦宄並作故其極惡也一曰民多被刑貌醜惡也班固以爲六畜謂之禍言其著也及人謂之痾痾病貌言寢深也

太宗永興三年民烏蘭喉下生骨狀如羊角長一尺餘
高祖太和十六年五月尚書李沖奏定州中山郡母極
縣民李班虎女獻容以去年九月二十日右手大拇指
甲下生毛九莖至十月二十日長一尺二寸

肅宗熙平二年十一月己未并州表送祁縣民韓僧真
女令姬從母右脇而生靈太后令付披庭

正光元年五月戊戌南兗州下蔡郡有大人跡見行七
步跡長一尺八寸廣七寸五分

高祖延興三年秋秀容郡婦人一產四男四產十六男
莊帝永安三年十一月丁卯京師民家妻產男一頭二

身四手四腳三耳

太和十六年十一月乙亥高祖與沙門道登幸侍中省
日入六鼓見一鬼衣黃褶袴當戶欲入帝以爲人叱之
而退問諸左右咸言不見唯帝與道登見之

顯祖皇興二年十月豫州疫民死十四五萬

世宗永平三年四月平陽之禽昌襄陵二縣大疫自正
月至是月死者二千七百三十人

金盻

太和十九年六月徐州表言丈八銅像汗流於地

永安普泰永熙中京師平等寺定光金像每流汗國有

事變時咸畏異之

永安三年二月京師民家有二銅像各長尺餘一頤下生白毫四一頤傍生黑毛一

龍蛇之孽

鴻範論曰龍鱗蟲也生於水雲亦水之象陰氣盛故其象至也人君下悖人倫上亂天道必有篡殺之禍

世祖神䴥三年三月有白龍二見于京師家人井中真君六年二月丙辰有白龍見于京師家人井中龍神物也而屈於井中皆世祖暴崩之徵也

肅宗正光元年八月有黑龍如狗南走至宣陽門躍而

上穿門樓下而出魏衰之徵也

莊帝永安二年晉陽龍見於井中久不去莊帝暴崩晉陽之徵也

前廢帝普泰元年四月甲寅有龍跡自宣陽門西出復入城乙卯羣臣入賀帝曰國將興聽於民將亡聽於神但當君臣上下克己爲治未足恃此爲慶

馬禍

鴻範論曰馬者兵象也將有寇戎之事故馬爲怪也肅宗熙平二年十一月辛未恒州送馬駒肉尾長一尺驥處不生毛

正光元年九月沃野鎮官馬爲蟲入耳死者十四五蟲似蠅長五寸已下大如櫛

牛禍

鴻範論易曰坤爲牛坤土也土氣亂則牛爲怪一曰牛禍其象宗廟將滅一曰轉輸煩則牛生禍

世宗景明二年五月冀州上言長樂郡牛生犢一頭二面二口三目三耳

羊禍

鴻範論曰君不明失政之所致

高祖太和二十三年三月肆州上言陽曲縣羊生羔一

頭二身一牝一牡三耳八足尋高祖崩六輔專事

世宗正始元年七月鄆善鎮送羊羔一頭兩身八脚

二年正月鄆善鎮送八脚羊

延昌四年五月薄骨律鎮上言羊羔一頭六足兩尾

豕禍

京房傳曰凡妖象其類足多者所任邪也京房易妖曰
豕生人頭豕身者邑且亂亡

高祖延興元年九月有司奏豫州刺史臨淮公王讓表
有賭生子一頭二身八足

世宗景明四年九月梁州上言犬豕交

正始四年八月京師賭生子一頭四耳兩身八足
延昌四年七月徐州上言陽平戍賭生子頭面似人頂
有肉髻體無毛靈太后幼主傾覆之徵也

鷄禍

鴻範論曰京房傳曰鷄小畜猶小臣也角者兵之象在
上君之威也此小臣執事者將秉君之威以生亂不治
之害

高祖太和元年夏五月有司奏京師有雌鷄二頭上生
冠如角與衆鷄異是時文明太后臨朝信用羣小之徵
世宗正始元年四月河南有鷄雛四足四翼語在崔光

傳

八月司州上言河內民席衆家雞雛近尾上復有一頭
口目具二頭皆從頸後各有二翼二足旁行是時世宗
頗任羣小更有朋黨邪佞于政之驗

延昌四年十二月洛州上言魏興太守常矯家黃雌鷄
頭上肉角大如棗長寸三分角上生聚毛長寸半

肅宗正光元年正月虎賁中郎將蘭撣家鷄雄雌二各
頭上生兩角其毛雜色上聳過冠時靈太后臨朝專政
羽蟲之孽

鴻範論曰視不明聽不聰之罰也

太宗泰常三年十一月京師獲白梟

肅宗正光二年八月己卯獲禿鷺鳥於殿內

孝昌二年四月民有送死鴨雛一頭兩身四足四翅兩尾

孝靜天平二年三月雄雉飛入尙書省殿中獲之

蝗蟲螟

鴻範論曰刑罰暴虐取利於下貪饕無厭以興師動衆取邑治城而失衆心則蟲爲害矣

高祖太和五年七月敦煌鎮蝗秋稼畧盡
六年七月青雍二州虸蚄害稼

八月徐東徐兗濟平豫光七州平原枋頭廣阿臨濟四
鎮蝗害稼

七年四月相豫二州蝗害稼

八年三月冀州相三州虸蚄害稼

四月濟光幽肆雍齊平七州蝗

六月乙巳相齊光青四州虸蚄害稼

十六年十月癸巳枹罕鎮蝗害稼

世宗景明元年五月青齊徐兗光南青六州虸蚄害稼
四年三月壬午河州大螟二麥無遺

五月光州虸蚄害稼

六月河州大蝗

七月東萊郡虸蚄害稼

正始元年六月夏司二州蝗害稼

四年四月青州步屈蟲害棗花

農郡蝗蟲並爲災

永平元年六月己巳涼州蝗害稼

五年五月青州步屈蟲害棗花

七月蝗蟲京師虸蚄

八月青齊光三州虸蚄害稼三分食二

肅宗熙元年六月青齊光南青四州虸蚄害稼

顯祖天安元年六月兗州有黑蟻與赤蟻交鬪長六十步廣四寸赤蟻斷頭而死黑主北赤主南十一月劉彧兗州刺史畢衆敬遣使內屬詔鎮南大將軍尉元納之大破賊將周凱等

高祖太和十年七月并州治中張萬壽表建興濩澤縣民賈日成以去四月中養蠶有絲網成幕中有卷物似絹帶長四尺廣三寸薄上復得黃繭二狀如履形

世宗正始二年三月徐州蠶蛾喫人延殘者一百一十餘人死者二十二人

毛蟲之孽

謂變常而爲異也

太祖登國中河南有虎七臥於河側三月乃去後一年
蚍蜉白鹿盡渡河北後一年河水赤如血此衛辰滅亡
之應及誅其族類悉投之河中其地遂空

孝靜元象元年正月有狼入城至硃石曹疑獲之

武定五年十二月北城銅爵臺上獲豹一

高祖太和元年五月辛亥有狐魅截人髮時文明太后
臨朝行多不正之徵也

肅宗熙平二年自春京師有狐魅截人髮人相驚恐六

月壬辰靈太后召諸截髮者使崇訓衛尉劉騰鞭之於
千秋門外事同太和也

瑞圖外鎮王公刺史二千石令長酷暴百姓人民怨嗟
則白鼠至

太宗永興三年二月京師民趙溫家有白鼠以獻

三年春於北苑獲白鼠一尋死割之腹中有三子盡白
四年三月上幸西宮獲白鼠一

八月御府民張安獲白鼠一

神瑞二年五月帝獵于檻嶠山獲白鼠一平城獲白鼠

三

六月平城獲白鼠二

八月豫章王夔獲白鼠一

泰常元年十一月京師民獲白鼴一以獻

二年六月中山獲白鼠二

三年三月京師獲白鼠一

十一月京師獲白鼠一

世祖始光三年八月相州魏郡獲白鼠

太延元年八月鴈門獻白鼠

高祖太和二十三年八月京師獲白鼠

世宗景明四年五月京師獲白鼠

正始元年六月京師獲白鼠

肅宗熙平元年四月肆州表送白鼠

魏書卷一百一十二上

魏書卷一百十二上考證

世宗延昌二年

闕

月丙戌京師地震○本書世宗紀延

昌二年有閏二月或以爲闕字應爲閏字又下文云

自延昌二年四月地震則此闕字應爲四字也

世宗永平五年七月蝗蟲京師虸蚄○蝗蟲不載地名

當有脫字

孝靜元象元年曹疑獲之○曹下舊注一疑字詩大雅

乃造其曹傳曹羣也史記平準書分曹循行郡國注

曹輩也則此曹字作羣字輩字解似無可疑者

魏書卷一百十二上考證

魏書卷一百一十二下

齊

魏

收

撰

志第十八

靈徵八下

魏氏世居幽朔至獻帝世有神人言應南遷於是傳位
於子聖武帝命令南徙山谷阻絕仍欲止焉復有神獸
其形似馬其聲類牛先行導引積年乃出始居匈奴之
故地

高祖延興元年十一月肆州秀容民獲麟以獻王者不
剖胎剖卵則至

世祖神䴥三年七月冀州獻白龜王者不私人以官尊
耆任舊無偏黨之應

高宗興安二年六月營州進大龜

高祖延興元年十二月徐州竹邑戍士邢德於彭城南
一百二十里得蓍一株四十九枝下掘得大龜獻之詔
曰龜蓍與經文相合所謂靈物也德可賜爵五等

三年六月京師獲大龜

肅宗神龜元年二月獲龜於九龍殿靈芝池大赦改元
孝靜武定三年十月有司奏南兗州陳留郡民賈興達
於家庭得毛龜一

天平四年八月有巨象至於南兗州碭郡民陳天愛以告送京師大赦改年王者自養有節則至

高祖太和二年十一月徐州獻黑狐周成王時治致太平而黑狐見

三年五月獲白狐王者仁智則至

六月撫寔獲白狐以獻

八年六月徐州獲黑狐以獻

十年三月冀州獲九尾狐以獻王者六合一統則見周文王時東夷歸之曰王者不傾於色則至德至鳥獸亦

至

十一
卷之三
三
十一年十一月冀州獲九尾狐以獻

二十三年正月司州河州各獻白狐狸

十九年六月司州平陽郡獲白狐以獻

世宗景明三年二月河州獻白狐

永平三年十月白狐見于汲郡

延昌四年四月兗州獻白狐

九月相州獻白狐

閏月汾州獻白狐二

肅宗正光二年三月南青州獻白狐二

三年六月平陽郡獻白狐

八月光州獻九尾狐

五年五月平陽郡獻白狐

孝靜天平四年四月西兗州獻白狐

六月光州獻九尾狐

元象元年四月光州獻九尾狐

二年二月光州獻九尾狐

興和三年五月司州獻九尾狐

十二月魏郡獻白狐

四年四月瀛州獻白狐二

武定元年七月幽州獲白狐以獻上

三年七月瀛州獻白狐二牡一牝一

九月西兗州獻白狐

太和二年十一月辛未泰州獻五色狗

三年三月齊州獻五色狗其五色如畫

太祖天興四年五月魏郡斥丘縣獲白鹿王者惠及下則至

太宗永興四年九月建興郡獻白鹿

世祖神䴥元年二月定州獲白麅白麅鹿又見于樂陵
因以改元

三年二月白鹿見于代郡倒刺山

太延四年十二月相州獻白鹿

真君八年五月洛州送白鹿

高宗太安二年十月白鹿見於京師西苑

高祖承明元年六月秦州獻白鹿

太和元年正月白鹿見於秦州

三月白鹿見於青州

四年正月南豫州獻白鹿

十九年七月司州獲白鹿麐以獻

二十年六月司州獻白鹿

世宗景明元年四月荊州獻白鹿

永平四年八月平州獻白鹿

延昌二年五月齊州獻白鹿

四年六月司州獻白鹿

肅宗熙平元年五月濟州獻白鹿

二年五月司州獻白鹿

神龜二年六月徐州獻白鹿

孝靜元象元年六月齊獻武王獲白鹿以獻

武定元年六月兗州獻白鹿

太祖登國六年十二月上獵親獲鹿一角召問羣臣皆曰鹿當二角今一是諸國將并之應也

高祖太和三年三月肆州獻一角鹿

神龜元年七月徐州獻一角鹿

世宗正始二年九月後軍將軍爾朱新興獻一角獸天下平一則至

肅宗熙平元年十一月肆州獻一角獸

神龜二年九月徐州獻一角獸

高宗太安二年三月有白狼一見於太平郡議者曰古今瑞應多矣然白狼見於成湯之世故殷道用興太平嘉名也又先帝本封之國而白狼見焉無窮之徵也周宣王得之而犬戎服

太宗永興四年十二月章安子封懿獻白麐王者刑罰
理則至

高祖太和二年十二月懷州獻白麐

三年五月白麐見於豫州

二十三年正月華州獻白麐

肅宗熙平二年三月徐州獻白麐

神龜二年七月徐州獻白麐

孝靜武定七年七月瀛州獻白麐

高祖太和七年六月青州獻三足鳥王者慈孝天地則
至

十三年十一月滎陽獻三足烏

十四年六月懷州獻三足烏

十五年閏月濟州獻三足烏

十七年五月冀州獻三足烏

二十年六月豫州獻三足烏

二十三年六月冀州獻三足烏

世宗景明元年五月徐州獻三足烏

三年二月豫州獻三足烏

四年六月幽州獻四足烏

正始元年二月冀州獻三足烏

五月幽州獻三足烏

是月相州獻三足烏

六月定州獻三足烏

二年五月肆州獻三足烏

三年三月豫州獻三足烏

是月豫州又獻三足烏

永平元年四月豫州獻三足烏

延昌三年二月冀州獻三足烏

肅宗熙平元年四月汲郡獻三足烏

二年四月東郡獻三足烏

是月豫州獻三足烏

南兗州又獻三足烏

神龜元年八月雍州獻三足烏

二年五月潁州郡獻三足烏

正光元年四月濟州獻三足烏

是月濟州又獻三足烏

二年閏月東郡獻三足烏

三年五月東郡獻三足烏

潁川郡許昌縣獻三足烏

肆州獻三足烏

六月冀州獻三足烏

四年六月瀛州獻三足烏

出帝太昌元年五月齊獻武王獲三足烏以獻
孝靜元象二年四月京師獲三足烏

武定三年五月瀛州獻三足烏

四年四月潁州獻三足烏

五月潁州又獻三足烏

高祖太和二年七月白烏見於涼州王者宗廟肅敬則
至

九月白鳥見於京師

三年五月白烏見於豫州

九月白烏見於秦州

十七年六月兗州獻白烏

二十三年十二月司州獻白烏

世宗正始二年五月司州獻白烏

三年九月潁川郡獻白烏

四年七月潁川又獻白烏

永平元年四月潁川獻白烏

延昌二年八月平陽郡獻白烏

三年六月冀州獻白烏

肅宗正光元年十月幽州獻白烏

孝靜天平二年七月齊獻武王獲白烏以獻

元象元年五月冀州獲白烏

二年八月徐州表濟陰郡廳事前槐樹烏巢於上烏母死有鵠銜食餚烏兒不失其時並皆長大賞太守帛十匹

興和四年四月魏郡貴鄉縣獲白烏鷄

五月京師獲白烏是月陽夏郡獻白烏

七月北豫州獻白烏

十月瀛州獻白烏

武定元年六月東郡民獻白鳥

三年五月北豫州獻白鳥

是月廣宗郡獻白鳥

潁州又獻白鳥

六月滄州獻白鳥

四年四月梁州獻白鳥

五月濟州獻白鳥

八月陽夏郡獻白鳥

高祖太和二年二月涼州獻赤鳥周武王時銜麥至而

克殷

肅宗熙平元年二月赤鳥見肆州秀容郡

神龜元年四月赤鳥見并州之晉陽縣

世宗景明二年十二月南青州獻蒼鳥君修行孝慈萬姓不好殺生則至

正始二年五月雍州獻蒼鳥

六月雍州又獻蒼鳥

永平二年四月河內獻蒼鳥

肅宗熙平元年六月冀州獻蒼鳥

前廢帝普泰元年五月河內獻蒼鳥

孝靜興和四年五月濟州獻蒼鳥

七月瀛州又獻蒼烏

武定元年四月兗州獻蒼烏

五月濟州又獻蒼烏

二年五月京師獲蒼烏

三年六月京師獲蒼烏

十月光州獻蒼烏

高祖延興二年四月幽州獻白鵲

四年九月白鵲見於中山

承明元年八月定冀二州俱獻白鵲

十一月定州又獻白鵲

太和二年十一月洛州獻白鵲

肅宗熙平元年正月定州獻白鵲

正光四年正月京師獲白鵲

孝靜興平二年五月京師獲白鵲

武定二年七月林慮獻白鵲

三年六月京師獲白鵲

世祖太平真君二年七月天有黃光洞照議者僉謂榮光也

高宗興光元年二月有雲五色所謂景雲太平之應也
景明二年六月有雲五色見於申酉之間

出帝太昌元年六月日初出有大黃氣成抱

世祖始光四年六月甘露降于太學王者德至天和氣
盛則降又王者敬老則桓受甘露王者尊賢愛老不失
細微則竹葦受

神䴥元年二月甘露降于范陽郡

二年四月甘露降于鄴

六月甘露降于平城宮

三年三月甘露降于鄴

四年五月甘露降于河西

太平真君元年四月甘露降于平原郡

高宗太安二年七月甘露降于常山郡

和平二年七月甘露降于京師

世宗景明三年八月甘露降于青州新城縣

永平元年十月甘露降于青州益都縣

延昌二年九月甘露降于齊州清河郡

三年十月齊州上言甘露降

四年七月甘露降于京師

肅宗正光三年十月甘露降華林園柏樹

四年八月甘露降顯美縣

孝靜元象二年三月甘露降于京師

武定五年十月甘露降齊文襄王第門柳樹

六年三月甘露降于京師

四月太山郡上言甘露降

太祖天興二年七月獲嘉禾於平城縣異莖同穎

八月廣寧送嘉禾一莖十一穗平城南十里郊嘉禾一

莖九穗告于宗廟

太宗永興二年十月嘉禾生于清河郡

泰常三年八月嘉禾生于渤海郡東光縣

世祖神䴥二年七月嘉禾生于魏郡安陽縣三本同穎

高祖承明元年八月齊州獻嘉禾

太和三年九月齊州獻嘉禾

五年八月常山獻嘉禾

七年八月定州獻嘉禾

世宗景明元年七月齊州獻嘉禾

三年七月齊州獻嘉禾

四年八月冀州獻嘉禾

正始元年八月濟州獻嘉禾

二年六月齊州獻嘉禾七月魯陽郡獻嘉禾八月司州

獻嘉禾

三年七月冀州獻嘉禾

永平三年八月滎陽獻嘉禾

肅宗熙平二年八月幽州獻嘉禾三本同穗

正光二年七月朔州獻嘉禾

三年八月肆州獻嘉禾一根生六穗

孝靜天平三年七月魏郡獻嘉禾

四年八月并州獻嘉禾

是月京師又獲嘉禾

虞曹郎中司馬仲璨又獻嘉禾一莖五穗

元象元年八月東雍州獻嘉禾

興和二年八月南青州獻嘉禾

四年八月京師再獲嘉禾

武定二年八月京師獲嘉禾

三年八月并州獻嘉禾

高祖太和三年十月徐州獻嘉瓠一蒂兩實

太祖天興二年七月并州獻白兔一王者敬耆老則見
三年五月車駕東巡幸廣寧有白兔見於乘輿前獲之
四年正月并州獻白兔

太宗永興三年上獵於西山獲白兔

八月京師獲白兔

泰常元年十一月定州安平縣獻白兔

二年六月京師獲白兔

三年六月頓丘郡獲白兔

世祖始光三年五月洛州獻黑兔

神䴥元年九月章武郡獻白兔

四年二月渤海郡獻白兔

真君七年二月青州獻白兔二

高宗和平三年十月雲中獲白兔

四年閏月鄴縣獲白兔

高祖延興五年四月白兔見于代郡

承明元年八月白兔見于雲中

太和元年六月雍州周城縣獻白兔

三年三月吐京鎮獻白兔

八年六月徐州獻白兔

十八年十月瀛州獻白兔

二十年七月汲郡獻黑兔

七月京師獲白兔

二十三年獲黑兔

世宗景明元年十一月河州獻白兔

三年四月潁川郡獻白兔

八月河內郡獻白兔

四年六月河內郡獻白兔

七月夏州獻黑兔

正始元年三月河南郡獻黑兔

四月魯陽郡獻白兔

二年八月東郡獻白兔

九月河內郡獻黑兔

是月肆州獻白兔東郡又獻白兔

三年七月薄骨律鎮獻白兔

九月肆州獻白兔

四年四月河內郡獻白兔

永平元年四月濟州獻白兔

五月河內獻黑兔

十月樂安郡獲白兔

二年二月相州獻白兔

延昌三年七月豫州獻白兔

四年三月河南獻白兔

八月河南又獻白兔

九月河內又獻白兔

肅宗熙平二年四月豫州獻白兔

五月東郡獻白兔

六月京師獲白兔

十一月鄯善鎮獻白兔

神龜元年六月京師獲黑兔

二年八月正平郡獻白兔

九月正平郡又獻白兔

十月京師獲黑兔

正光元年正月徐州獻白兔

五月冀州獻白兔

三年五月徐州獻白兔二

是月冀州獻白兔

孝靜天平二年八月光州獻白兔

四年十月光州獻白兔

元象元年五月徐州獲白兔

六月齊獻武王獲白兔以獻

是月濮陽郡獻白兔

興和二年四月徐州獻白兔

六月京師獲白兔

四年正月光州獻白兔

武定元年三月瀛州獻白兔

字
闕月汲郡獻白兔

六年十一月武平鎮獻白兔

太祖天興五年八月上曜軍覽谷見白鷺一

太宗永興三年六月京師獲白鷺

四年閏月京師又獲白鷺

泰常二年六月京師獲白鷺

高祖太和二年三月白鷺見于并州

八年四月白鷺集于京師

是月代郡獻白鷺

二十三年八月荊州獻白鷺

閏月正平郡獻白鷺

世宗景明三年六月涇州獻白鷺

肅宗熙平元年七月京師獲白鷺

孝靜元象元年八月西中府獻白鷺

興和二年三月京師獲白鷺

武定三年六月北豫州獻白鷺

太宗泰常八年五月鴈門獻白雀王者爵祿闕則白雀至

世祖神䴥元年九月滄水郡獻白雀

十月魏郡獻白雀

真君八年五月鴈門郡獻白雀

高祖延興二年二月白雀見于扶風郡

三年五月白雀見于代郡

四年正月青州獻白雀

太和三年五月白雀見於豫州

十三年正月清河武城縣獻白雀

世宗景明三年六月滎陽郡獻白雀

十月薄骨律鎮獻白雀

四年三月敦煌鎮獻白雀

五月京師獲白雀

六月恒農郡獻白雀

七月京師獲白雀

正始二年七月薄骨律鎮獻白雀

三年四月獲白雀於京師

十月河州獻白雀

十二月雍州獻白雀

四年二月豫州獻白雀

永平三年七月京師獲白雀

延昌三年七月河南郡獲白雀

十一月秦州獻白雀

四年五月滎陽獻白雀

八月秦州獻白雀

是月青州獻白雀

是月恒州獻白雀

是月洛陽獲白雀

十一月荊州獻白雀

肅宗熙平元年四月京師再獲白雀

七月宮中獲白雀

二年四月華州獻白雀

六月相州獻白雀

是月薄骨律鎮獻白雀

七月京師獲白雀

八月薄骨律鎮又獻白雀

是月京師獲白雀

十一月京師獲白雀

神龜元年五月京師獲白雀

六月京師獲白雀二

八月薄骨律鎮獻白雀

二年五月徐州獻白雀

是月京師獲白雀

三年七月京師又獲白雀

正光元年六月京師獲白雀

二年六月光州獻白雀

三年四月京師獲白雀

六月滎陽郡獻白雀

八月濟州獻白雀

是月光州獻白雀

九月白雀見舍人省

四年六月京師獲白雀

七月京師獲白雀

出帝太昌元年四月京師獲白雀

孝靜天平二年五月北豫州獻白雀

三年七月京師獲白雀

四年七月兗州獻白雀

元象元年五月京師獲白雀

六月京師獲白雀

七月肆州獻白雀

是月齊獻武王獲白雀

二年五月京師獲白雀

六年齊文襄王獲白雀以獻

是月南兗州獲白雀

七月京師獲白雀

興和二年四月京師獲白雀

閏月京師獲白雀

六月光州獻白雀

七月京師獲白雀

三年五月京師獲白雀

四年正月京師獲白雀

六月京師獲白雀

七月京師獲白雀

武定元年六月京師獲白雀

七月京師獲白雀

三年五月梁州獲白雀

七月京師獲白雀

十月兗州獲白雀

四年六月京師獲白雀

六年六月京師獲白雀

世宗景明三年三月濟州獻赤雀周文王時銜書至
四年五月獲赤雀於京師

永平元年四月京師獲赤雀

肅宗孝昌三年四月河南獲赤雀以獻

高宗和平四年三月冀州獻白鳩殷湯時至王者養者

老遵道德不以新失舊則至

高祖承明元年十一月冀州獻白鳩

太和二十三年七月瀛州獻白鳩

八月滎陽郡獻白鳩

世宗景明三年七月涇州獻白鳩

正始元年十月京師獲白鳩

是月建興郡獻白鳩

二年四月并州獻白鳩

七月冀州獻白鳩二

三年七月夏州獻白鳩

永平元年六月洛州獻白鳩

肅宗熙平二年九月汲郡獻白鳩

太祖天興四年春新興太守上言晉昌民賈相昔年二十二爲鴈門郡吏入句注西陘見一老父謂相曰自今以後四十二年當有聖人出於北方時當大樂子孫永長吾不及見之言終而過相顧視之父老化爲石人相今七十下檢石人見存至帝破慕容寶之歲四十二年真君五年二月張掖郡上言往曹氏之世丘池縣大柳谷山石表龍馬之形石馬脊文曰大討曹而晉氏代魏今石文記國家祖宗諱著受命之符乃遣使圖寫其文

大石有五皆青質白章間成文字其二石記張呂之前
已然之効其三石記國家祖宗以至于今其文記昭成
皇帝諱繼世四六天法平天下大安凡十四字次記太
祖道武皇帝諱應王載記千歲凡七字次記太宗明元
皇帝諱長子二百二十年凡八字次記太平天王繼世
主治凡八字次記皇太子諱昌封太山凡五字初上封
太平王天文圖錄又授太平真君之號與石文相應太
宗名諱之後有一人象攜一小兒見者皆曰上愛皇孫
提攜臥起不離左右此卽上象靈契真天授也於是衛
大將軍安樂王範輔國大將軍建寧王崇征西大將軍

常山王素征南大將軍恒農王奚斤上奏曰臣聞帝王之興必有受命之符故能經緯三才維建皇極三五之盛莫不同之伏羲有河圖八卦夏禹有洛書九疇至乃神功播于往古聖跡顯于來世伏惟陛下德合乾坤明並日月固天縱聖應運挺生上靈垂顧徵善備集是以始光元年經天師奉天文圖錄授太平真君之號陛下深執虛沖歷年乃受精誠感于靈物信惠協于天人用能威加四海澤流宇內溥天率土無思不服今張掖郡列言丘池縣大柳谷山大石有青質白章間成文字記國家祖宗之諱著受命歷數之符王公已下羣司百辟

覩此圖文莫不感動僉曰自古以來禎祥之驗未有今日之煥炳也斯乃上靈降命國家無窮之徵也臣等幸遭盛化沐浴光寵無以對揚天休增廣天地謹與羣臣參議宜以石文之徵宣告四海令方外僭竊知天命有歸制曰此天地況施乃先祖父之遺徵豈朕一人所能獨致可如所奏

太和元年冬十月南部尚書安定侯鄧宗慶奏鄉郡民李飛太原民王顯前列稱詣京南山採藥到遊越谷南嶺下見清碧石柱數百枚被詔案檢稱所見青碧柱長者一匹相接而上或方一尺二寸或方一尺方楞悉就

其數既多不可具數請付作曹採用奏可時人神異之顯祖皇興三年六月尉元表臣於彭城遣別將以八月至睢口邀賊將陳顯達有戰士於營外五里芻牧見一白頭翁乘白馬將軍呼之語稱至十八日辰必來到此語汝將軍領衆從東北臨入我當驅賊令走申時賊必大破宿豫淮揚皆剋無疑我當與汝國家淮畔爲斷下邳城我當驅出不勞兵力後十日此人復於彭城南戲馬臺東二里見白頭翁亦乘白馬從東北來呼此人謂曰我與東海四瀆太山北嶽神共行淮北助汝二將蕩除已定汝上下喜不因忽然不見詔元於老人前後見

所爲壇表記之

肅宗孝昌二年十月揚州刺史李憲表云門下督周伏
興以去七月患假還家至十一日夜夢度肥水行至草
堂寺南遙見七人一人乘馬著朱衣籠冠六人從後興
路左而立至便再拜問興何人興對曰李公門下督暫
使硃石其人語興君可回我是孝文皇帝中書舍人遣
語李憲勿憂賊堰此月破矣興行兩步錄興姓字令興
速白興寤曉遂還城具言夢狀七月二十七日堰破

世祖延和三年三月樂安王範獲玉璽一文曰皇帝璽
以獻

太延元年自三月不雨至六月使有司遍請羣神數日
大雨是日有婦人持一玉印至潞縣侯孫家賣之孫家
得印奇之求訪婦人莫知所在其文曰旱疫平寇天師
曰龍文紐書云此神中三字印也

高宗和平三年四月河內人張超於壞樓所城北故佛
圖處獲玉印以獻印方二寸其文曰富樂日昌永保無
疆福祿日臻長享萬年玉色光潤模制精巧百寮咸曰
神明所授非人爲也詔天下大酺三日

高祖承明元年八月上谷郡民獻王印上有蛟龍文
太和元年三月武川鎮獻玉印青質素文其文曰太昌

六月雍州獻玉印

是月長安鎮獻玉印一上有龜紐下有文字色甚鮮白
有殊常玉

三年七月定州鉅鹿民獻玉印一方七分上有文字
世宗永平元年四月瀛州民獲玉璧玉印各一以獻
肅宗熙平二年十一月京師仍獲玉璽二

孝靜興和三年二月東郡白馬縣民獻玉印一

太宗永興三年十二月北塞候人獲玉板二以獻王者
慈仁則見

孝靜天平二年二月員外散騎常侍穆禮得玉板一廣

卷一百一十一
三十六
三寸長尺五寸頭有兩孔以獻

高祖承明元年九月京兆民獻青玉璧一雙文色炳煥
王者賢良美德則至

肅宗正光二年六月并州靜林寺僧在陽邑城西橡谷
掘藥得玉璧五珪十印一玉柱一玉蓋一並以獻

高祖太和五年六月上邽鎮將上言於鎮城西二百五
十里射獵於營南千水中得玉車鉶三枚二青一赤制
狀甚精

孝靜興和四年七月鄴縣民獻白玉一璞

肅宗熙平二年正月金出岐州橫水縣赤粟谷

太祖天興三年四月有木連理生于代郡天門關之路
左王者德澤純洽八方爲一則生

八月渤海上言修縣東光縣木連理各一

十二月豫州上言木連理生于河內之沁縣

四年春河內郡木連理二

八月魏郡上言內黃縣木連理

太宗泰常元年十月范陽郡上言木連理

十一月常山郡上言木連理

三年正月渤海上言東光縣木連理

八月廣甯郡上言木連理

世祖神䴥四年九月滎陽郡上言木連理

延和二年三月樓煩南山木連理

三年九月上谷郡上言木連理

太延元年二月魏郡上言木連理

五年二月遼西上言木連理

高祖延興元年十一月祕書令楊崇奏鍾律郎李生於京師見長生連理樹

承明元年九月并州上言木連理相去一丈二尺中有五枝相連

太和元年三月冀州上言木連理

十七年六月京師木連理

十八年十月河南上言鞏縣木連理

二十三年十月并州上言百節連理生縣龜山濟州上
言木連理

十二月瀛州上言木連理

世宗景明二年正月瀛州上言平舒縣木連理

三年正月潁川郡上言木連理

二月平陽郡上言襄陵縣木連理

四月荊州上言南陽宛縣木連理

六月徐州上言東海木連理

十月秦州上言南稻新興二縣木連理各一

四年二月趙平郡上言鶴觚縣木連理

二月齊郡上言臨淄縣木連理

四月汾州上言五城郡木連理

五月青州上言莒縣木連理

六月恒農盧氏縣木連理

是月徐州上言梁郡下邑縣木連理

九月秦州上言當亭四縣界各木連理

正始元年五月司州上言滎陽京縣木連理

六月京師西苑木連理

七月河東郡上言聞喜縣木連理

八月河南郡上言慈水濱木連理

十月恒農郡上言崤縣木連理

十二月涼州上言石城縣木連理

二年正月汾州上言平昌縣木連理

二月司州上言崤縣木連理

九月司州上言潁川陽翟縣木連理

三年六月汾州上言永安縣木連理

是月京師木連理

七月潁川陽翟縣上言木連理

是月建德郡上言石城縣木連理

永平元年四月鄆州上言潁川郡木連理

二年四月司州上言恒農北陝縣木連理

三年十一月夏州上言橫風山木連理

延昌二年正月徐州上言建陵戍木連理

三年正月司州上言軺縣木連理

四年三月冀州上言信都縣木連理

六月京師木連理

九月雍州上言鄆縣木連理

肅宗熙平元年正月光州上言曲城縣木連理

二年十一月京師木連理

十二月敦煌鎮上言晉昌戍木連理

神龜元年正月汾州上言永安縣木連理

三月滄州上言饒安縣木連理

八月燕州上言上谷郡木連理

九月秦州上言隴西之武陽山木連理

二年六月夏州上言山鹿縣木連理

正光元年五月并州上言上黨東山谷中木連理

十一月齊州上言濟南郡靈壽山木連理

二年六月齊州上言魏郡逢陵縣木連理

二年二月涼州上言榆中縣木連理

三月青州上言平昌郡木連理

八月徐州上言龍元戌東木連理二

四年二月揚州上言汝陰縣木連理

八月涼州上言顯美縣木連理

孝昌元年十月魏郡元城縣木連理

孝靜天平二年四月臨水郡木連理

七月魏郡木連理

三年五月司州上言清河郡木連理

四年六月廣平郡上言木連理

八月并州上言木連理

元象元年二月洛州上言木連理

五月林慮縣上言木連理

八月上黨郡上言木連理

興和元年九月有司奏山西採材司馬張神和上言司

空谷木連理

二年四月光州上言盧鄉縣木連理

武定元年閏月西兗州上言濟陰郡木連理

九月齊獻武王上言并州木連理

三年九月瀛州上言河間郡木連理

五年十一月汾州上言木連理

六年五月晉州上言木連理

八年四月青州上言齊郡木連理

世宗景明三年七月魯陽獻烏芝王者慈仁則生食之
令人度世

太祖天興二年七月并州獻白雉周成王時越裳氏來

獻

四年正月上黨郡獻白雉

二月并州獻白雉

五月河內郡獻白雉

太宗神瑞二年十一月右民尚書周幾獲白雉一於博陵安平以獻

泰常三年正月渤海郡高城縣獻白雉

三月渤海郡南皮縣獻白雉二

十一月中山行唐縣獻白雉

四年正月新興郡獻白雉十二月又獻白雉二

五年二月白雉見于河內郡

世祖神䴥元年二月相州獻白雉

二年二月上黨郡獻白雉

高祖延興二年正月青州獻白雉

五年正月白雉見於上谷郡

太和元年二月秦州獻白雉

三月白雉見於秦州

十一月白雉見於安定郡

二年十一月徐州獻白雉

三年正月綱萬鎮獻白雉

四年正月南豫州獻白雉

六年三月豫州獻白雉

八年六月齊州青河郡獻白雉

十七年正月幽州獻白雉

四月瀛州獻白雉

二十年三月兗州獻白雉

世宗景明三年正月徐州獻白雉

二月冀州獻白雉

正始三年三月齊州獻白雉

十月青州獻白雉

四年十一月秦州獻白雉

永平二年四月河內郡獻白雉

六月河南獻白雉

十二月豫州獻白雉

延昌四年二月冀州獻白雉

是月京師獲白雉

閏月岐州獻白雉

十二月幽州獻白雉

肅宗熙平元年二月相州獻白雉

三月肆州獻白雉

二年三月徐州獻白雉

神龜元年三月潁川郡獻白雉

二年正月豫州獻白雉

正光三年二月夏州獻白雉

四年三月光州獻白雉

孝靜天平三年正月青州獻白雉

四年二月青州獻白雉十二月梁州獻白雉

元象二年正月魏郡繁陽縣獻白雉

武定元年正月廣宗郡獻白雉

是月兗州獻白雉

四年三月青州獻白雉

太宗泰常七年九月溫泉出于涿鹿人有風寒之疾入者多愈

高祖太和八年正月上谷郡惠化寺醴泉涌醴泉水之

精也味甘美王者修治則出

興和元年冬西兗州濟陰郡宛句縣濮水南岸有泉涌
出色清味甘飲者愈疾四遠奔湊齊獻武王令於泉所
營立廬舍尚書奏賞刺史粟千石太守粟五百石縣令
粟二百石以旌善政所感先列言者依第出身詔可
高宗太和二年九月鼎出於洛州澨水送于京師王者
不極滋味則神鼎出也

魏書卷一百十二下考證

高祖太和二十三年獲黑兔○獲字上不著地名殆承上二十年七月京師獲白兔而書之也

肅宗熙平二年六月相州獻白雀○月監本誤年今改

正

世祖真君五年記昭成皇帝諱繼世四六天法平天下大安凡十四字○帝各本訛作后今改正臣人龍按

昭成帝諱什翼犍今以什翼犍三字并下繼世四六天法平天下大安十一字合之恰與十四字之數相

符

次記太宗明元皇帝諱長子二百二十年凡八字○八
監本訛六今改正臣人龍按明元帝諱嗣今以嗣字
并下長子二百二十年七字合之則六字必係八字
之訛矣

高祖太和五年得玉車鉶三枚○鉶監本訛馴今改正

魏書卷一百十二下考證

魏書卷一百一十三

齊

魏

收

撰

志第十九

官氏九

百姓不能以自治故立君以司牧元首不可以獨斷乃
命臣以佐之然則安海內正國家非一人之力也書契
以外其事蔑聞至於羲軒昊頃之間龍火鳥人之職頗
可知矣唐虞六十夏商倍之周過三百是爲大備而秦
漢魏晉代有加減罷置盛衰隨時適務且國異政家殊
俗設官命職何常之有帝王爲治禮樂不相沿海內作

家物色非一用其由來尚矣魏氏世君玄朔遠統闕臣掌事立司各有號秩及交好南夏頗亦改朔昭成之卽王位已命燕鳳爲右長史許謙爲郎中令矣餘官雜號多同於晉朝建國二年初置左右近侍之職無常員或至百數侍直禁中傳宣詔命皆取諸部大人及豪族良家子弟儀貌端嚴機辯才幹者應選又置內侍長四人主顧問拾遺應對若今之侍中散騎常侍也其諸方雜人來附者總謂之烏丸各以多少稱曾庶長分爲南北部復置二部大人以統攝之時帝弟觚監北部子寔君監南部分民而治若古之二伯焉太祖登國元年因而

不改南北猶置大人對治二部是年置都統長又置幢將及外朝大人官其都統長領殿內之兵直王宮幢將員六人主三郎衛士直宿禁中者自侍中已下中散已上皆統之外朝大人無常員主受詔命外使出入禁中國有大喪大禮皆與參知隨所典焉

皇始元年始建曹省備置百官封拜五等外職則刺史太守令長已下有未備者隨而置之

天興元年十一月詔吏部郎鄧淵典官制立爵品十二月置八部大夫散騎常侍待詔管官其八部大夫於皇城四方四維面置一人以擬八座謂之八國常侍

待詔侍直左右出入王命

二年三月分尚書三十六曹及諸外署凡置三百六十
曹令大夫主之大夫各有屬官其有文簿當曹敷奏欲
以省彈駁之煩初令五經諸書各置博士國子學生員
三十人

三年十月置受恩蒙養長德訓士四官受恩職比特進
無常員有人則置親貴器望者爲之蒙養職比光祿大
夫無常員取勤舊休閑者長德職比中散大夫無常員
訓士職比諫議大夫規諷時政匡刺非違又置仙人博
士官典養鍊百藥

四年七月罷匈奴中郎將官令諸部護軍皆屬大將軍
府

九月罷外蘭臺御史總屬內省

十二月復尚書三十六曹曹置代人令史一人譯令史
一人書令史二人

天賜元年八月初置六謁官準古六卿其秩五品屬官
有大夫秩六品大夫屬官有元士秩七品元士屬官有
署令長秩八品令長屬官有署丞秩九品

九月減五等之爵始分爲四曰王公侯子除伯男二號
皇子及異姓元功上勲者封王宗室及始蕃王皆降爲

公諸公降爲侯侯子亦以此爲差於是封王者十人公者二十二人侯者七十九人子者一百三人王封大郡公封小郡侯封大縣子封小縣王第一品公第二品侯第三品子第四品又制散官五等五品散官比三都尉六品散官比議郎七品散官比太中中散諫議三大夫八品散官比郎中九品散官比舍人文官五品已下才能秀異者總比之造士亦有五等武官五品已下堪任將帥者亦有五等若百官有闕者則於中擢以補之初帝欲法古純質每於制定官號多不依周漢舊名或取諸身或取諸物或以民事皆擬遠古雲鳥之義諸曹

走使謂之鳬鴨取飛之迅疾以伺察者爲候官謂之白鷺取其延頸遠望自餘之官義皆類此咸有比况又制諸州各置都尉以領兵

十一月以八國姓族難分故國立大師小師令辯其宗黨品舉人才自八國以外郡各自立師職分如八國比今之中正也宗室立宗師亦如州郡八國之儀

十二月詔始賜王公侯子國臣吏大郡王二百人次郡王上郡公百人次郡公五十人侯二十五人子十二人皆立典師職比家丞總統羣隸

二年二月復罷尚書三十六曹別置武歸修勤二職武

歸比郎中修勤比令史分主省務

二年正月置內官員二十人比侍中常侍迭直左右
又制諸州置三刺史刺史用品第六者宗室一人異姓
二人比古之上中下三大夫也郡置三太守用七品者
縣置三令長八品者刺史令長各之州縣以太守上有
刺史下有令長雖置而未臨民自前功臣爲州者徵還
京師以爵歸第置散騎郎獵郎諸省令史省事典籤等
四年五月增置侍官侍直左右出內詔命取八國良家
代郡上谷廣甯鴈門四郡民中年長有器望者充之
永興元年十一月置駢驥官四十人宿直殿省比常侍

侍郎

神瑞元年春置八大人官大人下置三屬官總理萬機
故世號八公云

泰常二年夏置六部大人官有天部地部東西南北
部皆以諸公爲之大人置三屬官

始光元年正月置右民尚書

神䴥元年三月置左右僕射左右丞諸曹尚書十餘人
各居別寺

七月詔諸征鎮大將依品開府以置佐吏

延和元年三月改代尹爲萬年尹代令爲萬年令後復

真君五年正月侍中中書監宜都王穆壽司徒東郡公崔浩侍中廣平公張黎輔政置通事四人又選諸曹良吏給事東宮

正平元年七月以諸曹吏多減其員

興安二年正月置駕部尚書右士尚書

太安三年五月以諸部護軍各爲太守

延興二年五月詔曰非功無以受爵非能無以受祿凡出外遷者皆引此奏聞求乞假品在職有效聽下附正若無殊稱隨而削之舊制諸鎮將刺史假五等爵及有所貢獻而得假爵者皆不得世襲

四年二月置外牧官

五年九月置監御曹

太和二年五月減置侯職四百人司察非違

四年省二部內部幢將

十一年八月置散官員一百人朝請員二百人

十五年七月置司儀官

十二月置侍中黃門各四人又置散騎常侍侍郎員各四人通直散騎常侍侍郎員外散騎常侍侍郎各六人又置司空主客太倉庫部都牧太樂虞曹宮輿覆育少卿官又置光爵驍游五校中大夫散員士官又置侍官

一百二十人改立諸局監羽林虎賁

舊制諸以勲賜官爵者子孫世襲軍號十六年改降五等始革之止襲爵而已

舊制緣邊皆置鎮都大將統兵備禦與刺史同城隍倉庫皆鎮將主之但不治故爲重於刺史疑

自太祖至高祖初其內外百官屢有減置或事出當時不爲常目如萬騎飛鴻常忠直意將軍之徒是也舊令亡失無所依據太和中高祖詔羣寮議定百官著於令今列於左勲品流外位卑而不載矣

太師

太尉

儀同三司

太保

司徒

都督中外諸軍事

太傅

司空

特進

右三師

右三公

大司馬

諸開府

大將軍

驃騎將軍

車騎將軍

二將軍加大者位在三司上

衛將軍

加大者次儀同三司

右三將軍

右第一品上

右第一品中

右第一品下

太子太師

四征

加 大者次衛將軍

四鎮

加 大者次向書令

太子太傅

左右光祿大夫

吏部尚書

太子太保

尚書左僕射

太常

右東宮三師

尚書右僕射

光祿勳

尚書令

中書監

衛尉

都督府州諸軍事

右三卿

中軍將軍

鎮軍將軍

撫軍將軍

右三將軍

加大者秩
次四征下

金紫光祿大夫

右從第一品上

右從第一品中

右從第一品下

太子少師

列曹尚書

四安

加大者秩次三少下

太子少傅

中書令

凡將軍

三品已下五品
已上加大者

太子少保

領軍

太子左右詹事

右東宮三少

護軍

二職若侍臣
帶者加中

散騎常侍

中侍中

司州刺史

都督三州諸軍事

太僕

延尉

大鴻臚

宗正

大司農

少府

右六卿

領軍將軍

護軍將軍

二將軍與領
護不並置

右第二品上

右第二品中

右第二品下

前後左右將軍

祕書監

武衛將軍

四平

加大者秩
次護軍下

光祿大夫

銀青
者

都督一州諸軍事

大長秋卿

將作大匠

左衛將軍

右衛將軍

右從第二品上

右從第二品中

右從第二品下

駙馬

給事黃門侍郎

通直散騎常侍

諸王師

太子中庶子

城門校尉

太子左右衛率

南北東西中郎將

羽林中郎將

御史中尉

護匈奴羌戎夷蠻

越中郎將

中常侍

護羌戎夷蠻越校尉

征虜將軍

輔國將軍

龍驤將軍

司衛監

中尹

少卿

光爵

代尹

右第三品上

右第三品中

右第三品下

員外散騎常侍

中給事

鎮遠將軍

驍騎將軍

射聲校尉

安遠將軍

太子家令

越騎校尉

建遠將軍

太子率更令

屯騎校尉

建中將軍

太子僕

步兵校尉

建節將軍

太子庶子

長水校尉

立義將軍

給事中

監軍

立忠將軍

前後左右軍將軍

立節將軍

中大夫

恢武將軍

祕書令

勇武將軍

給事

曜武將軍

昭武將軍

顯武將軍

直閣將軍

右從第三品上

右從第三品中

右從第三品下

國子祭酒

公府司馬

諫議大夫

下大夫

尚書右丞

祕書丞

公府長史

司馬別駕

建武將軍

尚書左丞

太子中舍人

振武將軍

太子三校

中黃門令

奮武將軍

散騎侍郎

令

揚武將軍

中書侍郎

內署令

廣威將軍

中謁者大夫

都水使者

廣威將軍

中散大夫

符節令

中堅將軍

通直散騎常侍

中壘將軍

建威將軍

寧朔將軍

振威將軍

揚威將軍

奮威將軍

右第四品上

右第四品中

右第四品下

元士

諸開府司馬

諸王友

八府諮議參軍

司州功曹都官員

員外散騎侍郎

諸開府長史

五局司直

太子門大夫

尚書吏部郎中

司敗

協律中郎

太子洗馬

諸局校尉

戟楯虎賁將軍

武騎侍郎

符璽郎中

募員虎賁將軍

奉車都尉

高車虎賁將軍

駙馬都尉

左右積弩射將軍

騎都尉

強弩將軍

羽林中郎

中散庶長

謁者僕射

羽林郎將

高車羽林郎將

冗從僕射

右從第四品上

右從第四品中

右從第四品下

中軍鎮軍撫軍長史

中書議郎

皇宗博士

鷹揚將軍

諸開府從事中郎

歸義侯

折衝將軍

公府正參軍

率義侯

寧遠將軍

公府主簿

順義侯

揚烈將軍

延尉正監評

朝服侯

諸開府諮議參軍

太子舍人

太常丞

祕書著作郎

司州主簿

治書侍御史

中黃門

中謁者僕射

輕車將軍

中黃門冗從僕射 威遠將軍

侍御中散 虎威將軍

中軍鎮軍撫軍司馬 中散

公府從事中郎 殿中將軍

尚書郎中 散臣監

伏波將軍 太子倉令

陵江將軍

平漢將軍

太子食官令

太子中盾

右第五品上

右第五品中

右第五品下

祕書郎

太子廄長

附義中郎將

國子博士

諸局監

歸義中郎將

太學祭酒

尚書郎

率義中郎將

祕書著作佐郎

侍御史

順義中郎將

武士將軍

殿中御史

戟楯虎賁司馬

虎賁司馬

京邑市令

募員虎賁司馬

虎賁郎將

典牧都尉

高車虎賁司馬

方舞郎庶長

水衡都尉

戟楯虎賁將

宿衛軍將

司鹽都尉

募員虎賁將

掖庭監

司竹都尉

高車虎賁將

典客監

崇虛都尉

嘗藥監

典儀監

列卿丞

中謁者

協律郎

詹事丞

宮門司馬

太祝令

代尹丞

宗聖士

小黃門

諸開府正參軍

謁者

諸門府主簿

員外將軍

辨章郎

散員大夫

太宰令

太樂祭酒

廩犧令

門下錄事

殿中監

奉乘郎

翼馭郎

羽林郎

高車羽林郎

瞻人郎

方者郎

右從第五品上 右從第五品中 右從第五品下

公府行參軍

太學博士

散騎

宣威將軍

太史博士

奉朝請

明威將軍

律官博士

武烈將軍

襄武將軍

禮官博士

武毅將軍

厲威將軍

公府記室督

武奮將軍

公府掾屬

威烈將軍

太樂博士

中軍撫軍鎮軍正參軍

威寇將軍

河隄謁者

主書郎

威虜將軍

詹事五官

威戎將軍

門下主書舍人

威武將軍

門下通事舍人

司州司事

司州從事

代郡功曹主簿

右第六品上

右第六品中

右第六品下

諸開府行參軍

監淮海津都尉

戟楯虎賁

散員士

諸局中校尉

募員虎賁

中書舍人

方舞郎

高車虎賁

領護二衛主簿

諸宮門僕

治禮郎

主事郎

諸開府記室督

獄丞

詹事主簿

司馬督

集書舍人

千人督

中軍鎮撫行參軍

校尉

領護功曹掾

領護五官

散臣中校

宿衛統

太子常從虎賁督

侍幹

寺人

閨人

掌璽郎

太子守舍人

掌服郎

掌筵郎

虎賁郎

諸開府掾屬

集書校書郎

祕書校書郎

祕書鍾律郎

右從第六品上 右從第六品中 右從第六品下

公府舍人

國子學生

祕書舍人

太子主書舍人

討寇將軍

符史郎

太子主衣舍人

討虜將軍

盜寇將軍

都令史

討難將軍

盜虜將軍

主書令史

討夷將軍

盜難將軍

門下令史

盜逆將軍

太子左右衛率主簿

太廟門僕

司事郎

司州錄事

代郡通事

御屬

綏遠將軍

綏虜將軍

綏邊將軍

右第七品上

右第七品中

右第七品下

諸門府舍人

祝史

諸局督事

祕書令史

太常齋郎

獄掾

主書令史

王家尉

太學典錄

集書令史

公主家令

太史博士

起居注令史

太卜博士

直事郎

太醫博士

司州本曹

太常日者

散臣督事

扶令

宿衛幢將

太樂典錄

右從第七品上 右從第七品中 右從第七品下

公府令史

太學助教

厲武將軍

太子典書令史

掃寇將軍

厲鋒將軍

太子典衣令史

掃虜將軍

虎牙將軍

司事令史

掃難將軍

虎奮將軍

諸局通事

掃逆將軍

殄寇將軍

殄虜將軍

殄難將軍

殄夷將軍

右第八品上

右第八品中

右第八品下

直事令史

尚書筭生

諸寺筭生

宿衛軍司馬

典客舍人

諸局書令史

諸局省事

符券吏

虎賁軍書令史

尚書記室令史

公府閹下令史

乘傳使者

右從第八品上

右從第八品中

右從第八品下

諸開府令史

祀官齋郎

白衣臣

宿衛軍吏

典客參軍

諸局書吏

太醫太史助教

書幹

主書幹

典書幹

廣野將軍

橫野將軍

偏將軍

裨將軍

右第九品上

右第九品中

右第九品下

統史

方驛博士

八書吏

中校尉

王家吏

右從第九品上

右從第九品中

右從第九品下

太和十八年十二月降車驃將軍侍中黃門秩依魏晉

舊事

十九年八月初置直齊御仗左右武官

二十三年高祖復次職令及帝崩世宗初班行之以爲

永制

太師

太傅

太保

右三師上公

王

大司馬

大將軍

卷二十三

右二大

太尉

司徒

司空

開國郡公

右第一品

儀同三司

開國縣公

都督中外諸軍事

諸開府

散公

右從第一品

太子太師

太子太傅

太子太保

特進

尚書令

驃騎將軍

車騎將軍

二將軍加大者位在都督中外之下

衛將軍

加大者位在太子太師之上

四征將軍

加大者位次
衛大將軍

諸將軍加大者

左右光祿大夫

開國縣侯

右第二品

尚書僕射

若並置左右則左
居其上右居其下

中書監

司州牧

四鎮將軍

加大者次
衛將軍

中軍將軍

鎮軍將軍

撫軍將軍

右三將軍

金紫光祿大夫

散侯

右從第二品

吏部尚書

四安將軍

中領軍

中護軍二軍加將軍則去中位次撫軍

二軍加將軍則去中位次撫軍

太常

光祿

衛尉

右三卿

太子少師

太子少傅

太子少保

中書令

太子詹事

侍中

列曹尚書

四平將軍

太僕

廷尉

大鴻臚

宗正

大司農

太府

右六卿

河南尹

上州刺史

祕書監

諸王師

左右衛將軍

前左右後將軍

光祿大夫

銀青
者

開國縣伯

右第三品

散騎常侍

四方郎將

護匈奴羌戎夷蠻越中郎將

國子祭酒

御史中尉

大長秋卿

將作大匠

征虜將軍

二大二公長史

若司徒置二長史左在散
騎常侍下右在中庶子下

太子左右衛率

武衛將軍

冠軍將軍

護羌戎夷蠻越校尉

太中大夫

輔國將軍

中州刺史

龍驤將軍

卷之三
三
散伯

右從第三品

二大二公司馬

太常

光祿

衛尉

右三少卿

尚書吏部侍郎

給事黃門侍郎

太子中庶子

司空皇子長史

太僕

廷尉

大鴻臚

宗正

大司農

太府

右六少卿

中常侍

中尹

城門校尉

司空皇子司馬

從第一品將軍開府長史

驍騎將軍

游擊將軍

以前上階

鎮遠將軍

安遠將軍

平遠將軍

建義將軍

建忠將軍

建節將軍

立義將軍

立忠將軍

立節將軍

恢武將軍

勇武將軍

耀武將軍

昭武將軍

顯武將軍

從第一品將軍開府司馬

通直散騎常侍

司徒諮議參軍事 中散大夫 下州刺史

上郡太守內史相 開國縣子

右第四品

中堅將軍 中壘將軍 尚書左丞

二大二公諮議參軍事 司州別駕從事史

第二品將軍始蕃王長史 太子家令

太子率更令 太子僕 中書侍郎

太子庶子

第二品將軍始蕃王司馬 前左右後軍將軍

以前上階

寧朔將軍

建威將軍

振威將軍

奮威將軍

揚威將軍

廣威將軍

諫議大夫

尚書右丞

司空皇子諮議參軍事

司州治中從事史

左右中郎將

建武將軍

振武將軍

奮武將軍

揚武將軍

廣武將軍

從第一品將軍開府諮議參軍事

散子

右從第四品

寧遠將軍

鷹揚將軍

折衝將軍

揚烈將軍 從第二品將軍二藩王長史

二大二公從事中郎 祕書丞

皇子友 國子博士 散騎侍郎

太子中舍人 員外散騎常侍

從第二品將軍二藩王司馬

以前上階

射聲校尉 越騎校尉 屯騎校尉

步軍校尉

長水校尉

司空皇子之開府從事中郎

第二品將軍始蕃王諮議參軍事

開府從事中郎 中郡太守內史相

開國縣男

右第五品

伏波將軍

陵江將軍

平漢將軍

第三品將軍三蕃王長史

二大二公掾屬

著作郎

通直散騎常侍

太子洗馬

從第二品將軍二蕃王諮議參軍事

第二品將軍三蕃王司馬

奉車都尉

以前上階

太子屯騎校尉

太子步兵校尉

太子翼軍校尉

都水使者 司空皇子之開府掾屬

領護長史司馬 歸義侯

率義侯

順義侯 朝服侯

輕車將軍

威遠將軍 開府掾屬 虎威將軍

洛陽令 中給事中 散男

右從第五品

宣威將軍 明威將軍 從第三品將軍長史

二大二公主簿 二大二公錄事

皇子郎中令 司空主簿 司空皇子錄事參軍事

從第三品將軍司馬

第三品將軍三蕃王諮議參軍事

二大二公功曹記室戶曹倉曹中兵參軍事

皇子文學

治書侍御史

謁者僕射

從第一品將軍開府錄事參軍

司空皇子功曹記室戶曹倉曹中兵參軍事

皇子功曹史

以前上階

河南郡丞

虎賁中郎將

羽林監

冗從僕射

駙馬都尉

廷尉正監評

尚書郎中

中書舍人

從第一品將軍開府功曹記室倉曹戶曹中兵參軍事
功曹史

下郡太守內史相 上縣令相

右第六品

襄威將軍 厲威將軍

第二品將軍始蕃王錄事參軍

二大二公列曹參軍事

給事中

太子門大夫 皇子大農

騎都尉

符璽郎

以前上階

從第二品將軍二番王錄事參軍

皇子主簿 司空皇子列曹參軍事

第二品將軍始蕃王功曹記室戶曹倉曹中兵參軍事
功曹史

從第一品將軍開府主簿列曹參軍事

從第二品將軍二番王功曹記室戶曹倉曹中兵參軍事
事功曹史

太子舍人 三卿丞

右從第六品

威烈將軍 威寇將軍 威虜將軍

威戎將軍

威武將軍

四品正從將軍長史司馬

二大二公祭酒

第三品將軍三蕃王錄事參軍

司空皇子之開府祭酒

武烈將軍

武毅將軍

武奮將軍

王公國郎中令

積弩將軍

積射將軍

員外散騎侍郎

皇子中尉

二大二公參軍事

二大二公列曹行參軍

開府祭酒

以前上階

司空皇子參軍事

司空皇子列曹行參軍

從第三品將軍錄事參軍

第二品將軍始蕃王主簿列曹參軍事

從第一品將軍開府列曹行參軍

從第三品將軍三蕃王功曹記室戶曹倉曹中兵參軍

功曹史

從第二品將軍二蕃王主簿列曹參軍事

二衛司馬 討寇將軍

討虜將軍

討難將軍

討夷將軍

從第三品將軍功曹戶曹倉曹中兵參軍事

詹事丞

列卿丞

祕書郎中

著作佐郎

中縣令相

右第七品

盪寇將軍

盪虜將軍

盪難將軍

盪逆將軍

五品正從將軍長史司馬

強弩將軍

二大二公行參軍

司空皇子行參軍

第二品將軍始蕃王列曹行參軍

第三品將軍三蕃王主簿列曹參軍事

第一品將軍開府行參軍

王公國大農

以前上階

太學博士

皇子常侍

太常博士

從第二品將軍二蕃王參軍事

從第二品將軍二蕃王參軍事

從第三品將軍主簿列曹參軍事

四品正從將軍錄事功曹戶曹倉曹中兵參軍事

司州主簿

奉朝請

國子助教

右從第七品

殄寇將軍

殄虜將軍

殄難將軍

殄夷將軍

第二品將軍始蕃王行參軍

第三品將軍二蕃王參軍事

第三品將軍三蕃王列曹行參軍

四品正從將軍主簿列曹參軍事

侯伯國郎中令 司州西曹書佐

殿中將軍 皇子侍郎 大長秋丞

以前上階

侍御史

協律郎

辨章郎

從第二品將軍二蕃王行參軍

從第三品將軍參軍事

從第三品將軍列曹行參軍

五品正從將軍錄事功曹戶曹倉曹中兵參軍事

王公國中尉 司州祭酒從事

下縣令相

右第八品

掃寇將軍 掃虜將軍 掃難將軍

掃逆將軍 司州議曹從事史

二大二公長兼行參軍 公車令

符節令 諸署令千石已上者 中黃門令

門下錄事 尚書都令史 主書令史

殿中侍御史 中謁者僕射 中黃門冗從僕射

以前上階

宮門僕射 侯伯國大農

司空皇子長兼行參軍 二大二公長兼行參軍

皇子上中下將軍

皇子中大夫 二率丞

四品正從將軍列曹行參軍

王公國常侍

厲武將軍

厲鋒將軍

虎牙將軍

虎奮將軍

五品正從將軍主簿列曹行參軍

司州文學

從第一品將軍開府長兼行參軍

員外將軍

右從第八品

曠野將軍

橫野將軍

子男國郎中令

太祝令

諸署令

六百石
已上者

中黃門

公主家令

皇子典書令

四門小學博士

律博士

校書郎

二大二八公參軍督護

檢授御史

以前上階

王公國侍郎

侯伯國中尉

謁者

太子三卿丞

五品正從將軍列曹行參軍

司空皇子參軍督護

第二品將軍始蕃王長兼行參軍

從第一品將軍開府參軍督護

殿中司馬督

右第九品

偏將軍

裨將軍

太子廄長

監淮海津都尉

諸局都尉

皇子典祠令

皇子學官令

皇子典衛令

王公國上中下將軍

王公國中大夫

諸署令

不滿六百石者

以前上階

第二品將軍始蕃王參軍督護

從第二品將軍二蕃王長兼行參軍

太常光祿衛尉領護

詹事功曹五官 治禮郎

子男國大農 小黃門

員外司馬督

右從第九品

前世職次皆無從品魏氏始置之亦一代之別制也
正始元年十一月罷郡中正

四年九月詔曰五校昔統營位次於列卿奉車都尉禁
侍美官顯加通貴世移時變遂爲冗職旣典名猶昔宜
有定員并殿中二司馬亦須有常數今五校可各二十
人奉車都尉二十人騎都尉六十人殿中司馬二百人
員外司馬三百人

永平元年十二月尚書令高肇尚書僕射清河王懌等
奏置小學博士員三千人

二年正月尚書令高肇奏都水臺請依舊二使者參軍事謁者并錄事令史亦隨事史立詔曰使者置二可如所奏其下屬司唯須充事耳亦何勞多也參軍錄事並更置一謁者加二令史依舊肇又奏諸州諮議記室戶曹刑獄田曹水曹集曹士曹參軍悉併省之

四年七月詔改宗子羽林爲宗士其本秩付尚書計其資集敘從七已下從八已上官

正光元年七月置左右衛將軍各二人

十二月罷諸州中正郡縣定姓族後復

孝昌二年十月詔宗士庶子二官各增二百人置望士

隊四百人取肺府之族有武藝者

孝莊初以爾朱榮有扶翼之功拜柱國大將軍位在丞相上又拜大丞相天柱大將軍增佐吏又以太尉上黨王天穆爲太宰增佐吏

永安二年各詔復置司直十人視五品隸廷尉覆治御史檢劾事

普泰初以爾朱世隆爲儀同三司位次上公又侍中黃門武衛將軍並增置六人

永安已後遠近多事置京畿大都督復立州都督俱總軍人

天平四年夏罷六州都督悉隸京畿其京畿大都督仍不改焉立府置佐

舊制有大將軍不置太尉有丞相不置司徒自正光已後天下多事勲賢並輓乃俱置之

武定二年十一月有司奏齊獻武王勲高德重禮絕羣辟昔霍光陵邑亦置長丞主陵今請置長一人丞一人錄事一人戶曹史一人禁備史一人侍一人皆降帝陵官品一等其侍依舊詔可

七年三月詔左右光祿大夫各置二人金紫光祿大夫置四人光祿大夫置四人太中中散各置六人五月又

詔以四中郎將世宗永平中權隸領軍今還屬護軍
自古天子立德因生以賜姓胙之土而命之氏諸侯則
以家與謚官有世功則有宦族邑亦如之姓則表其所
由生氏則記族所由出其大略然也至於或自所居或
以國號或用官爵或用事物雖緣時不同俱其義矣魏
氏本居朔壤地遠俗殊賜姓命氏其事不一亦如長勺
尾氏終葵之屬也初安帝統國諸部有九十九姓至獻
帝時七分國人使諸兄弟各攝領之乃分其氏自後兼
并他國各有本部部中別族爲內姓焉年世稍久互以
改易興衰存滅間有之矣今舉其可知者

獻帝以兄爲紇骨氏後改爲胡氏

次兄爲普氏後改爲周氏

次兄爲拓拔氏後改爲長孫氏

弟爲達奚氏後改爲奚氏

次弟爲伊婁氏後改爲伊氏

次弟爲丘敦氏後改爲丘氏

次弟爲侯氏後改爲亥氏

七族之興自此始也

又命叔父之胤曰乙旃氏後改爲叔孫氏

又命疏屬曰車焜氏後改爲車氏

卷一百一十一

凡與帝室爲十姓百世不通婚太和以前國之喪葬祠
禮非十族不得與也高祖革之各以職司從事
神元皇帝時餘部諸姓內入者

丘穆陵氏後改爲穆氏

步六孤氏後改爲陸氏

賀賴氏後改爲賀氏

獨孤氏後改爲劉氏

賀樓氏後改爲樓氏

勿忸于氏後改爲于氏

是連氏後改爲連氏

僕闡氏後改爲僕氏

若干氏後改爲苟氏

拔列氏後改爲梁氏

撥略氏後改爲略氏

若口引氏後改爲寇氏

叱羅氏後改爲羅氏

普陋茹氏後改爲茹氏

賀葛氏後改爲葛氏

是賁氏後改爲封氏

阿伏于氏後改爲阿氏

可地延氏後改爲延氏

阿鹿桓氏後改爲鹿氏

他駱拔氏後改爲駱氏

薄奚氏後改爲薄氏

烏丸氏後改爲桓氏

素和氏後改爲和氏

吐谷渾氏依舊吐谷渾氏

胡古口引氏後改爲侯氏

賀若氏依舊賀若氏

谷渾氏後改爲渾氏

匹婁氏後改爲婁氏

俟力伐氏後改爲鮑氏

吐伏盧氏後改爲盧氏

牒云氏後改爲云氏

是云氏後改爲是氏

叱利氏後改爲利氏

副呂氏後改爲副氏

那氏依舊那氏

如羅氏後改爲如氏

乞扶氏後改爲扶氏

阿單氏後改爲單氏

俟幾氏後改爲幾氏

賀兒氏後改爲兒氏

吐奚氏後改爲古氏

出連氏後改爲畢氏

庾氏依舊庾氏

賀拔氏後改爲何氏

叱呂氏後改爲呂氏

莫那婁氏後改爲莫氏

奚斗盧氏後改爲索盧氏

莫蘆氏後改爲蘆氏

出大汙氏後改爲韓氏

沒路真氏後改爲路氏

扈地于氏後改爲扈氏

莫輿氏後改爲輿氏

紇干氏後改爲干氏

俟伏斤氏後改爲伏氏

是樓氏後改爲高氏

尸突氏後改爲屈氏

沓盧氏後改爲沓氏

喰石蘭氏後改爲石氏

解杜氏後改爲解氏

奇斤氏後改爲奇氏

須卜氏後改爲卜氏

丘林氏後改爲林氏

大莫干氏後改爲鄧氏

余綿氏後改爲綿氏

蓋樓氏後改爲蓋氏

素黎氏後改爲黎氏

渴單氏後改爲單氏

壹斗眷氏後改爲明氏

叱門氏後改爲門氏

宿六斤氏後改爲宿氏

亂邢氏後改爲邢氏

土難氏後改爲山氏

屋引氏後改爲房氏

樹洛于氏後改爲樹氏

乙弗氏後改爲乙氏

東方宇文慕容氏卽宣帝時東部此二部最爲彊盛別

自有傳

南方有茂眷氏後改爲茂氏

宥連氏後改爲雲氏

次南有紇豆陵氏後改爲竇氏

侯莫陳氏後改爲陳氏

庫狄氏後改爲狄氏

太洛稽氏後改爲稽氏

柯拔氏後改爲柯氏

西方尉遲氏後改爲尉氏

步鹿根氏後改爲步氏

破多羅氏後改爲潘氏

叱干氏後改爲薛氏

俟奴氏後改爲俟氏

輶遲氏後改爲展氏

費連氏後改爲費氏

其連氏後改爲綦氏

去斤氏後改爲艾氏

渴侯氏後改爲緜氏

叱盧氏後改爲祝氏

和稽氏後改爲緩氏

完賴氏後改爲就氏

溫益氏後改爲溫氏

達勃氏後改爲襄氏

獨孤渾氏後改爲杜氏

凡此諸部其渠長皆自統衆而尉遲已下不及賀蘭諸

部氏

北方賀蘭後改爲賀氏

郁都甄氏後改爲甄氏

統奚氏後改爲嵇氏

越勒氏後改爲越氏

叱奴氏後改爲狼氏

渴燭渾氏後改爲味氏

庫禡官氏後改爲庫氏

烏洛蘭氏後改爲蘭氏

一那婁氏後改爲婁氏

羽弗氏後改爲羽氏

凡此四方諸部歲時朝貢登國初太祖散諸部落始同爲編民

太和十九年詔曰代人諸胄先無姓族雖功賢之胤混然未分故官達者位極公卿其功衰之親任居猥任比欲制定姓族事多未就且宜甄擢隨時漸銓其穆陸賀

劉樓于嵇尉入姓皆太祖已降勲著當世位盡王公灼然可知者且下司州吏部勿充猥官一同四姓自此以外應班士流者尋續別敕原出朔土舊爲部落大人而自皇始已來有三世官在給事已上及州刺史鎮大將及品登王公者爲姓若本非大人而皇始已來職官三世尚書已上及品登王公而中間不降官緒亦爲姓諸部落大人之後而皇始已來官不及前列而有三世爲中散監已上外爲太守子都品登子男者爲族若本非大人而皇始已來三世有令已上外爲副將子都太守品登侯已上者亦爲族凡此姓族之支親與其身有總

麻服已內微有一二世官者雖不全充美例亦入姓族
五世已外則各自計之不蒙宗人之蔭也雖總麻而三
世官不至姓班有族官則入族官無族官則不入姓族
之例也凡此定姓族者皆具列由來直擬姓族以呈聞
朕當決姓族之首末其此諸狀皆須問宗族列疑明同
然後勾其舊籍審其官宦有實則奏不得輕信其言虛
長僥僩不實者訴人皆加傳旨問而詐不以實之坐選
官依職事答問不以實之條令司空公穆亮領軍將軍
元儼中護軍廣陽王嘉尚書陸琇等詳定北人姓務令
平均隨所了者三月一列簿帳送門下以聞於是升降

區別矣

世宗世代人猶以姓族辭訟又使尚書于忠尚書元匡侍中穆詔尚書元長等量定之

魏書卷一百一十三

魏書卷一百十三考證

第五品平漢將軍○漢各本訛作漠今改正

魏書卷一百十三考證

魏書卷一百一十四

齊

魏

收

撰

志第二十

釋老十

大人有作司牧生民結繩以往書契所絕故靡得而知焉自羲軒已還至於三代其神言秘策蘊圖緯之文範世率民垂墳典之迹秦肆其毒滅於灰燼漢採遺籍復若丘山司馬遷區別異同有陰陽儒墨名法道德六家之義劉歆著七略班固志藝文釋氏之學所未曾紀案漢武元狩中遣霍去病討匈奴至臯蘭過居延斬首大

獲昆邪王殺休屠王將其衆五萬來降獲其金人帝以爲大神列於甘泉宮金人率長丈餘不祭祀但燒香禮拜而已此則佛道流通之漸也及開西域遣張騫使大夏還傳其旁有身毒國一名天竺始聞有浮屠之教哀帝元壽元年博士弟子秦景憲受大月氏王使伊存口授浮屠經中土聞之未之信也後孝明帝夜夢金人頂有白光飛行殿庭乃訪羣臣傅毅始以佛對帝遣郎中蔡愔博士弟子秦景等使於天竺寫浮屠遺範愔仍與沙門攝摩騰竺法蘭東還洛陽中國有沙門及跪拜之法自此始也愔又得佛經四十二章及釋迦立像明

帝令畫工圖佛像置清涼臺及顯節陵上經減於蘭臺
石室惜之還也以白馬負經而至漢因立白馬寺於洛
城雍闐西摩騰法蘭咸卒於此寺浮屠正號曰佛陁佛
陁與浮圖聲相近皆西方言其來轉爲二音華言譯之
則謂淨覺言滅穢成明道爲聖悟凡其經旨大抵言生
生之類皆因行業而起有過去當今未來歷三世識神
常不滅凡爲善惡必有報應漸積勝業陶冶麤鄙經無
數形藻練神明乃致無生而得佛道其間階次心行等
級非一皆緣淺以至深藉微而爲著率在於積仁順禱
嗜慾習虛靜而成通照也故其始修心則依佛法僧謂

之三歸若君子之三畏也又有五戒去殺盜婬妄言飲酒大意與仁義禮智信同名爲異耳云奉持之則生天人勝處虧犯則墜鬼畜諸苦又善惡生處凡有六道焉諸服其道者則剃落鬚髮釋累辭家結師資遵律度相與和居治心修淨行乞以自給謂之沙門或曰桑門亦聲相近總謂之僧皆胡言也僧譯爲和命衆桑門爲息心比丘爲行乞俗人之信憑道法者男曰優婆塞女曰優婆夷其爲沙門者初修十誡曰沙彌而終於二百五十則具足成大僧婦入道者曰比丘尼其誡至於五百皆以闕爲本隨事增數在於防心攝身正口心去貪忿

癡身除殺婬盜口斷妄雜諸非正言總謂之十善道能具此謂之三業清淨凡人修行粗爲極云可以達惡善報漸階聖迹初階聖者有三種人其根業太差謂之三乘聲聞乘緣覺乘大乘取其可乘運以至道爲名此三人惡迹已盡但修心盪累濟物進德初根人爲小乘行四諦法中根人爲中乘受十二因緣上根人爲大乘則修六度雖階三乘而要由修進萬行拯度億流彌長遠乃可登佛境矣所謂佛者本號釋迦文者譯言能仁謂德充道備堪濟萬物也釋迦前有六佛釋迦繼六佛而成道處今賢劫文言將來有彌勒佛方繼釋迦繼六佛而

釋迦卽天竺二迦維衛國王之子天竺二其總稱迦維別名也初釋迦於四月八日夜從母右脅而生旣生姿相超異者三十二種天降嘉瑞以應之亦三十二其本起經說之備矣釋迦生時當周莊王九年春秋魯莊公七年夏四月恒星不見夜明是也至魏武定八年凡一千二百三十七年云釋迦年三十成佛導化羣生四十九載乃於拘尸那城娑羅雙樹間以二月十五日而入般涅槃涅槃譯云滅度或言常樂我淨明無遷謝及諸苦累也諸佛法身有二種義一者真實二者權應真實身謂至極之體妙絕拘累不得以方處期不可以形量限有

感斯應體常湛然權應身者謂和光六道同塵萬類生滅隨時修短應物形由感生體非實有權形雖謝真體不遷但時無妙感故莫得常見耳明佛生非實生滅非實滅也佛旣謝世香木焚尸靈骨分碎大小如粒擊之不壞焚亦不燋或有光明神驗胡言謂之舍利弟子收奉置之寶瓶竭香花致敬慕建宮宇謂爲塔塔亦胡言猶宗廟也故世稱塔廟於後百年有王阿育以神力分佛舍利於諸鬼神造八萬四千塔布於世界皆同日而就今洛陽彭城姑臧臨渭皆有阿育王寺蓋承其遺迹焉釋迦雖般涅槃而留影迹爪齒於天竺於今猶在中

土來往並稱見之初釋迦所說教法旣涅槃後有聲聞弟子大迦葉阿難等五百人撰集著錄阿難親承囑授多聞總持蓋能綜覈深致無所漏失乃綴文字撰載三藏十二部經如九流之異統其大歸終以三乘爲本後數百年有羅漢菩薩相繼著論贊明經義以破外道摩訶衍大小阿毗曇中論十二門論百法論成實論等是也皆傍諸藏部大義假立外問而以內法釋之漢章帝時楚王英喜爲浮屠齋戒遣郎中令奉黃繅白紩三十匹詣國相以贖愆詔報曰楚王尚浮屠之仁祠潔齋三月與神爲誓何嫌何疑當有悔吝其還贖以助伊蒲塞

桑門之盛饌因以班示諸國桓帝時襄楷言佛陁黃老
道以諫欲令好生惡殺少嗜慾去奢泰尚無爲魏明帝
曾欲壞宮西佛圖外國沙門乃金盤盛水置於殿前以
佛舍利投之於水乃有五色光起於是帝歎曰自非靈
異安得爾乎遂徙於道關爲作周閣百間佛圖故處鑿
爲濛汜池種芙蓉於中後有天竺沙門曇柯迦羅入洛
宣譯誠律中國誠律之始也自洛中構白馬寺盛飾佛
圖畫迹甚妙爲四方式凡宮塔制度猶依天竺舊狀而
重構之從一級至三五七九世人相承謂之浮圖或云
佛圖晉世洛中佛圖有四十二所矣漢世沙門皆衣赤

布後乃易以雜色晉元康中有胡沙門支恭明譯佛經
維摩法華三本起等微言隱義未之能究後有沙門常
山衛道安性聰敏日誦經萬餘言研求幽旨慨無師匠
獨坐靜室十二年覃思構精神悟妙曠以前所出經多
有舛駁乃正其乖謬石勒時有天竺沙門浮圖澄少於
烏萇國就羅漢入道劉曜時到襄國後爲石勒所宗信
號爲大和尚軍國規謨頗訪之所言多驗道安曾至鄴
候澄澄見而異之澄卒後中國紛亂道安乃率門徒南
遊新野欲令玄宗在所流布分遣弟子各趣諸方法汰
詣揚州法和入蜀道安與慧遠之襄陽道安後入苻堅

堅素欽德問旣見宗以師禮時西域有胡沙門鳩摩羅
什思通法門道安思與講釋每勸堅致羅什什亦承安
令問謂之東方聖人或時遙拜致敬道安卒後二十餘
載而羅什至長安恨不及安以爲深慨道安所正經義
與羅什譯出符會如一初無乖舛於是法旨大著中原
魏先建國於玄朔風俗淳一無爲以自守與西域殊絕
莫能往來故浮圖之教未之得聞或聞而未信也及神
元與魏晉通聘文帝又在洛陽昭成又至襄國乃備究
南夏佛法之事太祖平中山經略燕趙所逕郡國佛寺
見諸沙門道士皆致精敬禁軍旅無有所犯帝好黃老

頗覽佛經但天下初定戎車屢動庶事草創未建圖宇招延僧衆也然時時旁求先是有沙門僧朗與其徒隱于泰山之琨瑜谷帝遣使致書以繪素旃罽鉢錫爲禮今猶號曰朗公谷焉天興元年下詔曰夫佛法之興其來遠矣濟益之功冥及存沒神蹤遺軌信可依憑其勅有司於京城建飾容範修整宮舍令信向之徒有所居止是歲始作五級佛圖耆闍崛山及須彌山殿加以繢飾別構講堂禪堂及沙門座莫不嚴具焉太宗踐位遵太祖之業亦好黃老又崇佛法京邑四方建立圖像仍令沙門敷導民俗初皇始中趙郡有沙門法果誠行精

至開演法籍太祖聞其名詔以禮徵赴京師後以爲道人統綰攝僧徒每與帝言多所愜允供施甚厚至太宗彌加崇敬永興中前後授以輔國宜城子忠信侯安成公之號皆固辭帝常親幸其居以門小狹不容輿輦更廣大之年八十餘泰常中卒未殯帝三臨其喪追贈老壽將軍趙胡靈公初法果每言太祖明叡好道卽是當今如來沙門宜應盡禮遂常致拜謂人曰能鴻道者人主也我非拜天子乃是禮佛耳法果四十始爲沙門有子曰猛詔令襲果所加爵帝後幸廣宗有沙門曇證年且百歲邀見於路奉致果物帝敬其年老志力不衰亦

加以老壽將軍號是時鳩摩羅什爲姚興所敬於長安草堂寺集義學八百人重譯經本羅什聰辯有淵思達東西方言時沙門道彤僧曇道恒道禦僧肇曇影等與羅什共相提挈發明幽致諸深大經論十有餘部更定章句辭義通明至今沙門共所祖習道彤等皆識學治通僧肇尤爲其最羅什之撰譯僧肇常執筆定諸辭義注維摩經又著數論皆有妙旨學者宗之又沙門法顯慨律藏不具自長安遊天竺歷三十餘國隨有經律之處學其書語譯而寫之十年乃於南海師子國隨商人汎舟東下晝夜昏迷將二百日乃至青州長廣郡不其

勞山南下乃出海焉是歲神瑞二年也法顯所逕諸國傳記之今行於世其所得律通譯未能盡正至江南更與天竺禪師跋陀羅辯定之謂之僧祇律大備于前爲今沙門所持受先是有沙門法領從揚州入西域得華嚴經本定律後數年跋陀羅共沙門法業重加譯撰宣行於時世祖初卽位亦遵太祖太宗之業每引高德沙門與共談論於四月八日與諸佛像行於廣衢帝親御門樓臨觀散花以致禮敬先是沮渠蒙遜在涼州亦好佛法有罽賓沙門曇摩識習諸經論於姑臧與沙門智嵩等譯涅槃諸經十餘部又曉術數禁呪歷言他國安

危多所中驗蒙遜每以國事諮之神龐中帝命蒙遜送
識詣京師惜而不遣旣而懼魏威責遂使人殺識識死
之日謂門徒曰今時將有客來可早食以待之食訖而
走使至時人謂之知命智嵩亦爽悟篤志經籍後乃以
新出經論於涼土教授辯論幽旨著涅槃義記戒行峻
整門人齊肅知涼州將有兵役與門徒數人欲往胡地
道路饑餓絕糧積日弟子求得禽獸肉請嵩彊食嵩以
戒自誓遂餓死於酒泉之西山弟子積薪焚其屍骸骨
灰燼唯舌獨全色狀不變時人以爲誦說功報涼州自
張軌後世信佛教敦煌地接西域道俗交得其舊式村

塢相屬多有塔寺太延中涼州平徙其國人於京邑沙門佛事皆俱東象教彌增矣尋以沙門衆多詔罷年五十已下者世祖初平赫連昌得沙門惠始姓張家本清河聞羅什出新經遂詣長安見之觀習經典坐禪於白渠北晝則入城聽講夕則還處靜坐三輔有識多宗之劉裕滅姚泓留子義真鎮長安義真及寮佐皆敬重焉義真之去長安也赫連屈丐追敗之道俗少長咸見坑戮惠始身被白刃而體不傷衆大怪異言於屈丐屈丐大怒召惠始於前以所持寶劒擊之又不能害乃懼而謝罪統萬平惠始到京都多所訓導時人莫測其迹世

祖甚重之每加禮敬始自習禪至於沒世稱五十餘年未嘗寢臥或時跣行雖履泥塵初不汙足色愈鮮白世號之曰白脚師太延中臨終於八角寺齊潔端坐僧徒滿側凝泊而絕停屍十餘日坐旣不改容色如一舉世神異之遂瘞寺內至真君六年制城內不得留瘞乃葬於南郊之外始死十年矣開殯儼然初不傾壞送葬者六千餘人莫不感慟中書監高允爲其傳頌其德迹惠始冢上立石精舍圖其形像經毀法時猶自全立世祖卽位富於春秋旣而銳志武功每以平定禍亂爲先雖歸宗佛法敬重沙門而未存覽經教深求緣報之意及

得寇謙之道帝以清淨無爲有仙化之證遂信行其術
時司徒崔浩博學多聞帝每訪以大事浩奉謙之道尤
不信佛與帝言數加非毀常謂虛誕爲世費害帝以其
辯博頗信之會蓋吳反杏城關中騷動帝乃西伐至於
長安先是長安沙門種麥寺內御騎牧馬於麥中帝入
觀馬沙門飲從官酒從官入其便室見大有弓矢矛楯
出以奏聞帝怒曰此非沙門所用當與蓋吳通謀規害
人耳命有司案誅一寺閱其財產大得釀酒具及州郡
牧守富人所寄藏物蓋以萬計又爲屈室與貴室女私
行淫亂帝既忿沙門非法浩時從行因進其說詔誅長

安沙門焚破佛像勅留臺下四方令一依長安行事又
詔曰彼沙門者假西戎虛誕妄生妖孽非所以一齊政
化布淳德於天下也自王公已下有私養沙門者皆送
官曹不得隱匿限今年二月十五日過期不出沙門身
死容止者誅一門時恭宗爲太子監國素敬佛道頻上
表陳刑殺沙門之濫又非圖像之罪今罷其道杜諸寺
門世不修奉土木丹青自然毀滅如是再三不許乃下
詔曰昔後漢荒君信惑邪僞妄假睡夢事胡妖鬼以亂
天常自古九州之中無此也夸誕大言不本人情叔季
之世闇君亂主莫不眩焉由是政教不行禮義大壞鬼

道熾盛視王者之法蔑如也自此以來代經亂禍天罰
亟行生民死盡五服之內鞠爲丘墟千里蕭條不見人
迹皆由於此朕承天緒屬當窮運之敝欲除僞定真復
羲農之治其一切盪除胡神滅其蹤迹庶無謝於風氏
矣自今以後敢有事胡神及造形像泥人銅人者門誅
雖言胡神問今胡人共云無有皆是前世漢人無賴子
弟劉元真呂伯彊之徒乞胡之誕言用老莊之虛假附
而益之皆非真實至使王法廢而不行蓋大姦之魁也
有非常之人然後能行非常之事非朕孰能去此歷代
之僞物有司宣告征鎮諸軍刺史諸有佛圖形像及胡

經盡皆擊破焚燒沙門無少長悉坑之是歲真君七年
三月也恭宗言雖不用然猶緩宣詔書遠近皆豫聞知
得各爲計四方沙門多亡匿獲免在京邑者亦蒙全濟
金銀寶像及諸經論大得秘藏而土木宮塔聲教所及
莫不畢毀矣始謙之與浩同從車駕苦與浩諍浩不肯
謂浩曰卿今促年受戮滅門戶矣後四年浩誅備五刑
時年七十浩旣誅死帝頗悔之業已行難中修復恭宗
潛欲興之未敢言也佛淪廢終帝世積七八年然禁稍
寬弛篤信之家得密奉事沙門專至者猶竊法服誦習
焉唯不得顯行於京都矣先是沙門曇曜有操尚又爲

恭宗所知禮佛法之滅沙門多以餘能自效還俗求見
耀誓欲守死恭宗親加勸喻至於再三不得已乃止密
持法服器物不暫離身聞者歎重之高宗踐極下詔曰
夫爲帝王者必祇奉明靈顯彰仁道其能惠著生民濟
益羣品者雖在古昔猶序其風烈是以春秋嘉崇明之
禮祭典載功施之族況釋迦如來功濟大千惠流塵境
等生死者歎其達觀覽文義者貴其妙明助王政之禁
律益仁智之善性排斥羣邪開演正覺故前代已來莫
不崇尚亦我國家常所尊事也世祖太武皇帝開廣邊
荒德澤遐及沙門道士善行純誠惠始之倫無遠不至

風義相感往往如林夫山海之深怪物多有姦淫之徒
得容假託講寺之中致有兇黨是以先朝因其瑕釁戮
其有罪有司失旨一切禁斷景穆皇帝每爲慨然值軍
國多事未遑修復朕承洪緒君臨萬邦思述先志以隆
斯道今制諸州郡縣於衆居之所各聽建佛圖一區任
其財用不制會限其好樂道法欲爲沙門不問長幼出
於良家性行素篤無諸嫌穢鄉里所明者聽其出家率
大州五十小州四十人其郡遙遠臺者十人各當局分
皆足以化惡就善播揚道教也天下承風朝不及夕往
時所毀圖寺仍還修矣佛像經論皆復得顯京師沙門

師賢本罽賓國王種人少入道東遊涼城涼平赴京罷
佛法時師賢假爲醫術還俗而守道不改於修復日卽
反沙門其同輩五人帝乃親爲下髮師賢仍爲道人統
是年詔有司爲石像令如帝身旣成顏上足下各有黑
石冥同帝體上下黑子論者以爲純誠所感興光元年
秋勅有司於五緇大寺內爲太祖已下五帝鑄釋迦立
像五各長一丈六尺都用赤金二萬五千斤太安初有
師子國胡沙門邪奢遺多浮陀難提等五人奉佛像三
到京都皆云備歷西域諸國見佛影迹及肉髻外國諸
王相承咸遣工匠摹寫其容莫能及難提所造者去十

餘步視之炳然轉近轉微又沙勒湖沙門赴京師致佛
鉢并畫像迹和平初師賢卒曇曜代之更名沙門統初
曇曜以復佛法之明年自中山被命赴京值帝出見于
路御馬前銜曜衣時以爲馬識善人帝後奉以師禮曇
曜白帝於京城西武州塞鑿山石壁開窟五所鐫建佛
像各一高者七十尺次六十尺彫飾奇偉冠於一世曇
曜奏平齊戶及諸民有能歲輸穀六十斛入僧曹者卽
爲僧祇戶粟爲僧祇粟至於儉歲賑給飢民又請民犯
重罪及官奴以爲佛圖戶以供諸寺掃洒歲兼營田輸
粟高宗並許之於是僧祇戶粟及寺戶徧於州鎮矣曇

曜又與天竺沙門常那邪舍等譯出新經十四部又有
沙門道進僧超法存等並有名於時演唱諸異顯祖卽
位敦信尤深覽諸經論好老莊每引諸沙門及能談玄
之士與論理要初高宗太安末劉駿於丹陽中興寺設
齋有一沙門容止獨秀舉衆往目皆莫識焉沙門惠璩
起問之答名惠明又問所住答云從天安寺來語訖忽
然不見駿君臣以爲靈感改中興爲天安寺是後七年
而帝踐祚號天安元年是年劉彧徐州刺史薛安都始
以城地來降明年盡有淮北之地其歲高祖誕載於時
起永寧寺構七級佛圖高三百餘尺基架博敞爲天下

第一又於天宮寺造釋迦立像高四十三尺用赤金十萬斤黃金六百斤皇興中又構三級石佛圖棖棟楣楹上下重結大小皆石高十丈鎮固巧密爲京華壯觀高祖踐位顯祖移御北苑崇光宮覽習玄籍建鹿野佛圖於苑中之西山去崇光右十里巖房禪堂禪僧居其中焉延興二年夏四月詔曰比丘不在寺舍遊涉村落交通姦猾經歷年歲令民間五五相保不得容止無籍之僧精加隱括有者送付州鎮其在畿郡送付本曹若爲三寶巡民教化者在外齋州鎮維那文移在臺者齋都維那等印牒然後聽行違者加罪又詔曰內外之人興

建福業造立圖寺高敞顯博亦足以輝隆至教矣然無
知之徒各相高尚貧富相競費竭財產務存高廣傷殺
昆蟲含生之類苟能精致累土聚沙福鍾不朽欲建爲
福之因未知傷生之業朕爲民父母慈養是務自今一
切斷之又詔曰夫信誠則應遠行篤則感深歷觀先世
靈瑞乃有禽獸易色草木移性濟州東平郡靈像發輝
變成金銅之色殊常之事絕於往古熙隆妙法理在當
今有司與沙門統曇曜令州送像達都使道俗咸覩實
相之容普告天下皆使聞知三年十二月顯祖因田鷹
獲鴛鴦一其偶悲鳴上下不去帝乃惕然問左右曰此

飛鳴者爲雌爲雄左右對曰臣以爲雌帝曰何以知對曰陽性剛陰性柔以剛柔推之必是雌矣帝乃慨然而歎曰雖人鳥事別至於資識性情竟何異哉於是下詔禁斷鷺鳥不得畜焉承明元年八月高祖於永寧寺設太法供度良家男女爲僧尼者百有餘人帝爲剃髮施以僧服令修道戒資福於顯祖是月又詔起建明寺太和元年二月幸永寧寺設齋赦死罪囚三月又幸永寧寺設會行道聽講命中祕二省與僧徒討論佛義施僧衣服寶器有差又於方山太祖營壘之處建思遠寺自正光至此京城內寺新舊且百所僧尼二千餘人四方

諸寺六千四百七十八僧尼七萬七千二百五十八人
四年春詔以鷹師爲報德寺九年秋有司奏上谷郡比
丘尼惠香在北山松樹下死屍形不壞爾來三年士女
觀者有千百於時人皆異之十年冬有司又奏前被勅
以勒籍之初愚民僥倖假稱入道以避輸課其無籍僧
尼罷遣還俗重被旨所檢僧尼寺主維那當寺隱審其
有道行精勤者聽仍在道爲行凡麤者有籍無籍悉罷
歸齊民今依旨簡遣其諸州還俗者僧尼合一千三百
二十七人奏可十六年詔四月八日七月十五日聽大
州度一百人爲僧尼中州五十人下州二十人以爲常

準著於令十七年詔立僧制四十七條十九年四月帝幸徐州白塔寺顧謂諸王及侍官曰此寺近有名僧嵩法師受成實論於羅什在此流通後授淵法師淵法師授登紀二法師朕每翫成實論可以釋人深情故至此寺焉時沙門道登雅有義業爲高祖眷賞恒侍講論曾於禁內與帝夜談同見一鬼二十年卒高祖甚悼惜之詔施帛一千匹又設一切僧齋并命京城七日行道又詔朕師登法師奄至徂背痛怛摧慟不能已已比藥治慎喪未容卽赴便準師義哭諸門外續素之又有西域沙門名跋隨有道業深爲高祖所敬信詔於少室山陰

立少林寺而居之公給衣供二十一年五月詔曰羅什法師可謂神出五才志入四行者也今常住寺猶有遺地欽悅修蹤情深遐邇可於舊堂所爲建三級浮圖又見逼辱虐爲道殄軀旣暫同俗禮應有子肩可推訪以聞當加敘接先是立監福曹又改爲昭玄備有官屬以斷僧務高祖時沙門道順惠覺僧意惠紀僧範道弁惠度智誕僧顯僧義僧利並以義行知重世宗卽位永平元年秋詔曰緇素旣殊法律亦異故道教彰於互顯禁勸各有所宜自今已後衆僧犯殺人已上罪者仍依俗斷餘犯悉付昭玄以內律僧制之二年冬沙門統惠深

上言僧尼浩曠清濁混流不遵禁典精麤莫別輒與經律法師羣議立制諸州鎮郡維那上坐寺主各令戒律自修咸依內禁若不解律者退其本次又出家之人不應犯法積八不淨物然經律所制通塞有方依律車牛淫人不淨之物不得爲已私畜唯有老病年六十以上者限聽一乘又比來僧尼或因三寶出貸私財緣州外又出家捨著本無凶儀不應廢道從俗其父母三師遠聞凶問聽哭三日若在見前限以七日或有不安寺舍遊止民間亂道生過皆由此等若有犯者脫服還民其有造寺者限僧五十以上啟聞聽造若有輒營置者處

以違勅之罪其僧寺僧衆擯出外州僧尼之法不得爲俗人所用若有犯者還配本屬其外國僧尼來歸化者求精檢有德行合三藏者聽住若無德行遣還本國若其不去依此僧制治罪詔從之先是於恒農荆山造珉玉丈六像一三年冬迎置於洛濱之報德寺世宗躬觀致敬四年夏詔曰僧祇之粟本期濟施儉年出貸豐則收入山林僧尼隨以給施民有窘敝亦卽賑之但主司冒利規取贏息及其徵責不計水旱或償利過本或翻改券契侵蠹貧下莫知紀極細民嗟毒歲月滋深非所以矜此窮乏宗尚慈拯之本意也自今已後不得傳委

維那都尉可令刺史共加監括尚書檢諸有僧祇穀之處州別列其元數出入贏息賑給多少并貸償歲月見在未收上臺錄記若收利過本及翻改初券依律免之勿復徵責或有私債轉施償僧卽以丐民不聽收檢後有出貸先盡貧窮徵債之科一準舊格富有之家不聽輒貸脫仍冒濫依法治罪又尚書令高肇奏言謹案故沙門統曇曜昔於承明元年奏涼州軍戶趙苟子等二百家爲僧祇戶立課積粟擬濟饑年不限道俗皆以拯施又依內律僧祇戶不得別屬一寺而都維那僧暹僧頻等進違成旨退乖內法肆意任情奏求逼召致使吁

差之怨盈於行道棄子傷生自縊溺死五十餘人豈是
仰贊聖明慈育之意深失陛下歸依之心遂令此等行
號巷哭叫訴無所至乃白羽貫耳列訟宮闈悠悠之人
尚爲哀痛況慈悲之士而可安之請聽苟子等還鄉課
輸儉乏之年周給貧寡若有不虞以擬邊捍其暹等違
旨背律謬奏之愆請付昭玄依僧律推處詔曰暹等特
可原之餘如奏世宗篤好佛理每年常於禁中親講經
論廣集名僧標明義旨沙門條錄爲內起居焉上旣崇
之下彌企尚至延昌中天下州郡僧尼等積有一萬三
千七百二十七所徒侶逾衆熙平元年詔遣沙門惠生

使西域採諸經律正光三年冬還京師所得經論一百七十部行於世二年春靈太后令曰年常度僧依限大州應百人者州郡於前十日解送三百人其中州二百人小州一百人州統維那與官及精練簡取充數若無精行不得濫採若取非人刺史爲首以違旨論太守縣令綱寮節級連坐統及維那移五百里外異州爲僧自今奴婢悉不聽出家諸王及親貴亦不得輒啓請有犯者以違旨論其僧尼輒度他人奴婢者亦移五百里外爲僧僧尼多養親識及他人奴婢子年大私度爲弟子自今斷之有犯還俗被養者歸本等寺主聽容一人出

寺五百里二人千里私度之僧皆由三長罪不及已容
多隱濫自今有一人私度皆以違旨論隣長爲首里黨
各相降一等縣滿十五人郡滿三十人州鎮滿三十人
免官察吏節級連坐私度之身配當州下役時法禁寬
穢不能改肅也景明初世宗詔大長秋卿白整準代京
靈巖寺石窟於洛南伊闕山爲高祖文昭皇太后營石
窟二所初建之始窟頂去地三百一十尺至正始二年
中始出斬山二十三丈至大長秋卿王質謂斬山太高
費功難就奏求下移就平去地一百尺南北一百四十
尺永平中中尹劉騰奏爲世宗復造石窟一凡爲三所

從景明元年至正光四年六月已前用功八十萬二千三百六十六肅宗熙平中於城內太社西起永寧寺靈太后親率百寮表基立刹佛圖九層高四十餘丈其諸費用不可勝計景明寺佛圖亦其亞也至於官私寺塔其數甚衆神龜元年冬司空公尚書令任城王澄奏曰仰惟高祖定鼎嵩瀍卜世悠遠慮括終始制洽天人造物開符垂之萬葉故都城制云城內唯擬一永寧寺地郭內唯擬尼寺一所餘悉城郭之外欲令永遵此制無敢踰矩逮景明之初微有犯禁故世宗仰修先志爰發明旨城內不造立浮圖僧尼寺舍亦欲絕其希覬文武

二帝豈不愛尚佛法蓋以道俗殊歸理無相亂故也但俗眩虛聲僧貪厚潤雖有顯禁猶自冒營至正始三年沙門統惠深有違景明之禁便云營就之寺不忍移毀求自今已後更不聽立先旨舍寬抑典從請前班之詔仍卷不行後來私謁彌以奔競永平二年深等復立條制啓云自今已後欲造寺者限僧五十已上聞徹聽造若有輒營置者依俗違勅之罪其寺僧衆擯出外州邇來十年私營轉盛罪擯之事寂爾無聞豈非朝格雖明恃福共毀僧制徒立顧利莫從者也不俗不道務爲損法人而無厭其可極乎夫學迹沖妙非浮識折辯玄門

曠寂豈短辭能究然淨居塵外道家所先功緣冥深匪尚華遁苟能誠信童子聚沙可邁於道場純隨儉設足薦於雙樹何必縱其盜竊資營寺觀此乃民之多幸非國之福也然比日私造動盈百數或乘請公地輒樹私福或啓得造寺限外廣制如此欺罔非可稍計臣以才劣誠忝工務奉遵成規裁量是總所以披尋舊旨研究圖格輒遣府司馬陸昶屬崔孝芬都城之中及郭邑之內檢括寺舍數乘五百空地表剝未立塔宇不在其數民不畏法乃至於斯自遷都已來年踰二紀寺尊民居三分且一高祖立制非徒欲使緇素殊途抑亦防微深

慮世宗述之亦不錮禁營福當在杜塞未萌今之僧寺
無處不有或比滿城邑之中或連溢屠沽之肆或三五
少僧共爲一寺梵唱屠音連簷接響像塔纏於腥臊性
靈沒於嗜慾真僞混居往來紛雜下司因習而莫非僧
曹對制而不問其於汙染真行塵穢練僧薰蕕同器不
亦甚歟往在北代有法秀之謀近日冀州遭大乘之變
皆初假神教以惑衆心終設姦詭用逞私悖太和之制
因法秀而杜遠景明之禁慮大乘之將亂始知祖宗叢
聖防遏處深履霜堅冰不可不慎昔如來闡教多依山
林今此僧徒戀著城邑豈湫隘是經行所宜浮誼必栖

禪之宅當由利引其心莫能自止處者既失其真造者或損其福乃釋氏之糟糠法中之社鼠內戒所不容王典所應棄矣非但京邑如此天下州鎮僧寺亦然侵奪細民廣占田宅有傷慈矜用長嗟苦且人心不同善惡亦異或有栖心真趣道業清遠者或外假法服內懷悖德者如此之徒宜辯涇渭若雷同一貫何以勸善然覩法贊善凡人所知矯俗避嫌物情同趣臣獨何爲孤議獨發誠以國典一廢追理至難法網暫失條綱將亂是以冒陳愚見兩願其益臣聞設令在於必行立罰責能肅物令而不行不如無令罰不能肅孰與亡罰頃明詔

屢下而造者更滋嚴限驟施而違犯不息者豈不以假
福託善幸罪不加人殉其私吏難苟劾前制無追往之
辜後旨開自今之恕悠悠世情遂忽成法今宜加以嚴
科特設重禁糾其來違懲其往失脫不峻檢方垂容借
恐今旨雖明復如往日又旨令所斷標榜禮拜之處悉
聽不禁愚以爲樹榜無常禮處難驗欲云有造立榜證
公須營之辭指言嘗禮如此則徒有禁名實通造路且
從御已後斷詔四行而私造之徒不懼制旨豈是百官
有司怠於奉法將由網漏禁寬容託有他故耳如臣愚
意都城之中雖有標榜營造麤功事可改立者請依先

制在於郭外任擇所便其地若買得券證分明者聽其轉之若官地盜作卽令還官若靈像旣成不可移撤請依今勅如舊不禁悉令坊內行止不聽毀坊開門以妨里內通巷若被旨者不在斷限郭內準此商量其廟像嚴立而逼近屠沽請斷旁屠殺以潔靈居雖有僧數而事在可移者令就閑敞以避隘陋如今年正月赦後造者求依僧制案法科治若僧不滿五十者共相通容小就大寺必令克限其地賣還一如上式自今外州若欲造寺僧滿五十已上先令本州表列昭玄量審奏聽乃立若有違犯悉依前科州郡已下容而不禁罪同違旨

庶仰遵先皇不朽之業俯奉今旨慈悲之令則繩墨可
全聖道不墜矣奏可未幾天下喪亂加以河陰之酷朝
士死者其家多捨居宅以施僧尼京邑第舍略爲寺矣
前日禁令不復行焉元象元年秋詔曰梵境幽玄義歸
清曠伽藍淨土理絕囂塵前朝城內先有禁斷自聿來
遷鄴率由舊章而百辟士民届都之始城外新城並皆
給宅舊城中暫時普借更擬後須非爲永久如聞諸人
多以二處得地或捨舊城所借之宅擅立爲寺知非已
有假此一名終恐因習滋甚有虧恒式宜付有司精加
隱括且城中舊寺及宅並有定帳其新立之徒悉從毀

廢冬又詔天下牧守令長悉不聽造寺若有違者不問財之所出并計所營功庸悉以枉法論興和二年春詔以鄴城舊宮爲天平寺世宗以來至武定末沙門知名者有惠猛惠辨惠深僧暹道欽僧獻道晞僧深惠光惠顯法榮道長並見重於當世自魏有天下至於禪讓佛經流通大集中國凡有四百二十五部合一千九百一十九卷正光已後天下多虞工役尤甚於是所在編民相與入道假慕沙門實避調役猥濫之極自中國之有佛法未之有也略而計之僧尼大衆二百萬矣其寺三萬有餘流弊不歸一至於此識者所以歎息也道家之

原出於老子其自言也先天地生以資萬類上處玉京
爲神王之宗下在紫微爲飛仙之主千變萬化有德不
德隨感應物厥迹無常授軒轅於峨嵋教帝嚳於牧德
大禹聞長生之訣尹喜受道德之旨至於丹書紫字昇
玄飛步之經玉石金光妙有靈洞之說如此之人不可
勝紀其爲教也咸蠲去邪累澡雪心神積行樹功累德
增善乃至白日昇天長生世上所以秦皇漢武甘心不
息靈帝置華蓋於灌龍設壇場而爲禮及張陵受道於
鵠鳴因傳天官章本千有二百弟子相授其事大行齋
祠跪拜各成法道有三元九府百二十官一切諸神咸

所統攝又稱劫數頗類佛經其延康龍漢赤明開皇之屬皆其名也及其劫終稱天地俱壞其書多有禁祕非其徒也不得輒觀至於化金銷玉行符勅水奇方妙術萬等千條上云羽化飛天次稱消災滅禍故好異者往往而尊事之初文帝入賓於晉從者務勿塵姿神奇偉登仙於伊闕之山寺識者咸云魏祚之將大太祖好老子之言誦詠不倦天興中儀曹郎董謐因獻服食仙經數十篇於是置仙人博士立仙坊煮鍊百藥封西山以供其薪蒸令死罪者試服之非其本心多死無驗太祖猶將修焉太醫周澹苦其煎採之役欲廢其事乃陰令

妻貨仙人博士張曜妾得曜隱罪曜懼死因請辟穀太
祖許之給曜資用爲造淨堂於苑中給酒掃民二家而
鍊藥之官仍爲不息久之太祖意少懈乃止世祖時道
士寇謙之字輔真南雍州刺史讚之弟自云寇恂之十
三世孫早好仙道有絕俗之心少修張魯之術服食餌
藥歷年無效幽誠上達有仙人成公興不知何許人至
謙之從母家傭賃謙之常覲其嫂見其形貌甚彊力作
不倦請回貨興代已使役乃將還令其開舍南辣田謙
之樹下坐算興懇一發致勤時來看算謙之謂曰汝但
力作何爲看此二三日後復來看之如此不已後謙之

算七曜有所不了憫然自失興謂謙之曰先生何爲不
擇謙之曰我學算累年而近算周髀不合以此自愧且
非汝所知何勞問也興曰先生試隨興語布之俄然便
決謙之歎伏不測興之淺深請師事之興固辭不肯但
求爲謙之弟子未幾謂謙之曰先生有意學道豈能與
興隱遁謙之欣然從之興乃令謙之絜齋三日共入華
山令謙之居一石室自出採藥還與謙之食藥不復飢
乃將謙之入嵩山有三重石室令謙之住第二重歷年
興謂謙之曰興出後當有人將藥來得但食之莫爲疑
怪尋有人將藥而至皆是毒蟲臭惡之物謙之大懼出

走興還問狀謙之具對興歎息曰先生未便得仙政可爲帝王師耳興事謙之七年而謂之曰興不得久留明日中應去興亡後先生幸爲沐浴自當有人見迎興乃入第三重石室而卒謙之躬自沐浴明日中有叩石室者謙之出視見兩童子一持法服一持鉢及錫杖謙之引入至興尸所興歎然而起著衣持鉢執杖而去先是有京兆灞城人王胡兒其叔父亡頗有靈異曾將胡兒至嵩高別嶺同行觀望見金室玉堂有一館尤珍麗空而無人題曰成公興之館胡兒怪而問之其叔父曰此是仙人成公興館坐失火燒七間屋被讐爲寇謙之作

弟子七年始知謙之精誠遠通興乃仙者謫滿而去謙之守志嵩岳精專不懈以神瑞二年十月乙卯忽遇大神乘雲駕龍導從百靈仙人玉女左右侍衛集止山頂稱太上老君謂謙之曰往辛亥年嵩岳鎮靈集仙宮主表天曹稱自天師張陵去世已來地上曠誠修善之人無所師授嵩岳道士上谷寇謙之立身直理行合自然才任軌範首處師位吾故來觀汝授汝天師之位賜汝雲中音誦新科之誠二十卷號曰並進言吾此經誠自天地開闢以來不傳於世今運數應出汝宣吾新科清整道教除去三張僞法租米錢稅及男女合氣之術大

道清虛豈有斯事專以禮度爲首而加之以服食閉練使王九疑人長客之等十二人授謙之服氣導引口訣之法遂得辟穀氣盛體輕顏色殊麗弟子十餘人皆得其術泰常八年十月戊戌有牧土上師李譜文來臨嵩岳云老君之玄孫昔居代郡桑乾以漢武之世得道爲牧土宮主領治三十六土人鬼之政地方十八萬里有奇蓋歷術一章之數也其中爲方萬里者有三百六十萬遺弟子宣教云嵩岳所統廣漢平土方萬里以授謙之作誥曰吾處天宮敷演真法處汝道年二十二歲除十年爲竟蒙其餘十二年教化雖無大功且有百授之

勞今賜汝遷入內宮太真太寶九州真師治鬼師治民
師繼天師四錄修勤不懈依勞復遷賜汝天中三真太
文錄勅召百神以授弟子文錄有五等一曰陰陽太官
二曰正府真官三曰正房真官四曰宿宮散官五曰並
進錄主壇位禮拜衣冠儀式各有差品凡六十餘卷號
曰錄圖真經付汝奉持轉佐北方泰平真君出天宮靜
論之法能興造克就則起真仙矣又地上生民未劫垂
及其中行教甚難但令男女立壇宇朝夕禮拜若家有
嚴君功及上世其中能修身練藥學長生之術卽爲真
君種民藥別授方銷練金丹雲英八石玉漿之法皆有

決要上師李君手筆有數篇其餘皆正真書曹趙道覆所書古文鳥迹篆隸雜體辭義約辯婉而成章大自與世禮相準擇賢推德信者爲先勤者次之又言二儀之間有三十六天中有三十宮宮有一主最高者無極至尊次曰大至真尊次天覆地載陰陽真尊次洪正真尊姓趙名道隱以殷時得道牧土之師也牧土之來赤松王喬之倫及韓終張安世劉根張陵近世仙者並爲翼從牧土命謙之爲子與羣仙結爲徒友幽冥之事世所不了謙之具問一一告焉經云佛者昔於西湖得道在四十二天爲延真宮主勇猛苦教故其弟子皆髡形染

衣斷絕人道諸天衣服悉然始光初奉其書而獻之世祖乃令謙之止於張曜之所供其食物時朝野聞之若存若亡未全信也崔浩獨異其言因師事之受其法術於是上疏讚明其事曰臣聞聖王受命則有天應而河圖洛書皆寄言於蟲獸之文未若今日人神接對手筆粲然辭旨深妙自古無比昔漢高雖復英聖四皓猶或耻之不爲屈節今清德隱仙不召自至斯誠陛下侔蹤軒黃應天之符也豈可以世俗常談而忽上靈之命臣竊懼之世祖欣然乃使謁者奉玉帛牲牢祭嵩岳迎致其餘弟子在山中者於是崇奉天師顯揚新法宣布天

下道業大行浩事天師禮拜甚謹人或譏之浩聞之曰
昔張釋之爲王生結襪吾雖才非賢哲今奉天師足以
不愧於古人矣及嵩高道士四十餘人至遂起天師道
場於京城之東南重壇五層遵其新經之制給道士百
二十人衣食齊肅祈請六時禮拜月設厨會數千人世
祖將討赫連昌太尉長孫嵩難之世祖乃問幽徵於謙
之謙之對曰必克陛下神武應期天經下治當以兵定
九州後文先武以成太平真君真君三年謙之奏曰今
陛下以真君御世建靜輪天宮之法開古以來未之有
也應登受符書以彰聖德世祖從之於是親至道壇受

符錄備法駕旗幟盡青以從道家之色也自後諸帝每
卽位皆如之恭宗見謙之奏造靜輪宮必令其高不聞
雞鳴狗吠之聲欲上與天神交接功役萬計經年不成
乃言於世祖曰人天道殊卑高定分今謙之欲要以無
成之期說以不然之事財力費損百姓疲勞無乃不可
乎必如其言未若因東山萬仞之上爲功差易世祖深
然恭宗之言但以崔浩贊成難違其意沉吟者久之乃
曰吾亦知其無成事旣爾何惜五三百功九年謙之卒
葬以道士之禮先於未亡謂諸弟子曰及謙之在汝曹
可求遷錄吾去之後天宮真難就復遇設會之日更布

二席於上師坐前弟子問其故謙之曰仙官來是夜卒
前一日忽言吾氣息不接腹中大痛而行止如常至明
旦便終須臾口中氣狀若烟雲上出窓中至天半乃消
屍體引長弟子量之八尺三寸三日已後稍縮至歛量
之長六寸於是諸弟子以爲尸解變化而去不死也時
有京兆人韋文秀隱於嵩高徵詣京師世祖曾問方士
金丹事多曰可成文秀對曰神道幽昧變化難測可以
闇遇難以豫期臣昔者受教於先師曾聞其事未之爲
也世祖以文秀關右豪族風操溫雅言對有方遣與尚
書崔頤詣王屋山合丹竟不能就時方士至者前後數

人河東祁纖好相人世祖賢之拜纖上大夫潁陽絳略聞喜吳劭道引養氣積年百餘歲神氣不衰恒農閭平仙博覽百家之言然不能達其意辭占應對義旨可聽世祖欲授之官終辭不受扶風魯祈遭赫連屈子暴虐避地寒山教授弟子數百人好方術少嗜慾河東羅崇之常餌松脂不食五穀自稱受道於中條山世祖令崇還鄉里立壇祈請崇云條山有穴與崐崙蓬萊相屬入穴中得見仙人與之往來詔令河東郡給所須崇入穴行百餘步遂窮後召至有司以崇誣罔不道奏治之世祖曰崇修道之人豈至欺妄以詐於世或傳聞不審而

至於此古之君子進人以禮退人以禮今治之是傷朕
待賢之意遂赦之又有東萊人王道翼少有絕俗之志
隱韓信山四十餘年斷粟食麥通達經章書符錄常隱
居深山不交世務年六十餘顯祖聞而召焉青州刺史
韓頽遣使就山徵之翼乃赴都顯祖以其仍守本操遂
令僧曹給衣食以終其身太和十五年秋詔曰夫至道
無形虛寂爲主自有漢以後置立壇祠先朝以其至順
可歸用立寺宇昔京城之內居舍尚希今者里宅櫛比
人神猥湊非所以祇崇至法清敬神道可移於都南桑
乾之陰岳山之陽永置其所給戶五十以供齊祀之用

仍名爲崇虛寺可召諸州隱士員滿九十人遷洛移鄴
踵如故事其道壇在南郊方二百步以正月七日七月
七日十月十五日壇主道士高人一百六人以行拜祠
之禮諸道士罕能精至又無才術可高武定六年有司
執奏罷之其有道術如河東張遠遊河間趙靜通等齊
文襄王別置館京師而禮接焉

魏書卷一百十四考證

皆以闕爲本○闕一本作五戒

其中能修身練藥○練監本訛作縛今改正

魏書卷一百十四考證

編修臣孫人龍謹言魏書一百三十卷國子監舊板歷久漫漶奉

勅校刊

臣

謹與同事

臣

陳浩

臣

齊召南等各就聞見共

錄爲考證如千條魏收書貽譏穢史宋以前亡逸

不完者三十餘卷後之人取北史等書以補之明

所刻二十一史中此書又最爲剝敝宋劉恕明馮

夢禎等論之綦詳今欲摘謬辯謗不留遺憾此實

難矣惟參校各本悉心檢覈信則徵信疑則傳疑

云爾

臣

人龍謹識

原任詹事

臣

陳浩編修

臣

孫人龍中允

臣

齊召南

拔貢生

臣

蕭梅奉

勅恭校刊